

Rom

¹ Nai Pol, Jesus Kristus san urat tamol, an̄sam na girek en n̄iganeg ipalu ya. Anut sen n̄ai ipilianag a, an lo in̄san aposel n̄ilasa ya. Ago dop an lo n̄ai Anut san bilaluñ uyanan an n̄abol ilasa wa.

² In̄ gubak mi in̄san profet awad lo promis id ipanad ak igo, murnap bilaluñ uyanan en ilasa wa, agod profet an bilaluñ en niñen o in̄aned girek gun ak lo digire ya.

³ Bilaluñ uyanan en man in̄anen Nanun idsad Tubun ak ilasa wan niñen o ibol. Nanun emaiak tinin lo man bagen Dawid san dar lo ilasa ya.

⁴ Gug Awan Urgan in̄ tamol an san dabai tutubu yan ikubiai panad a, man dugo, maten̄ lo imasag kumaen imado yan tile ya. Ago man Urgan kulob an lo in̄ niñen o igo ibol, tamol en Anut Nanun mok a. In̄ Jesus Kristus, idsad Tubun a.

⁵ In̄ lo mi Anut man̄ ilon imun̄anama ya, agod man̄ yan̄ak aposel an ipanama ya. Man̄ urat migane yan lo, tamolpein Juda tia yak fidian luluñad lo tamolpein aenta migiaip, an lo Jesus niñen o ilod rumok pe in̄anen awan paen na dumado wa. Man̄ ago migane wo ipilianama ya.

⁶ Agod an̄ dam tamolpein ensauta a Anut igiaig in̄anen tamolpein dilasa yan luluñad lo amado ya.

⁷ Aria, n̄ai an̄ Rom tamolpein sam na girek en n̄igane ipalu da. Anut an̄ niñemi wo tubun mi imat da, agog in̄san tamolpein gun ak amado wo igian̄ a. Anut idsad Tamad, agod Jesus Kristus idsad

Tubun en, in mi inşad ilo panek agod inşad maror an lo pempem yen a.

Pol Rom tamolpein yil o imat a

⁸ Mel malmalan nrupaian man igo ya. Saen an fidian ninemi wo ilog isou dop man nai Jesus Kristus lo Anut ilo uyan nupani da. Man dugo, tan fufulek fidian en san tamolpein in anşam ilo rumok Jesus lo yan ninen o dininjen da.

⁹ Man dugo, Anut e nai ilog fidian lo inanen Nanun san bilaluñ uyan ak lo biabi nigane den, patug fo itur dugo naisag ninjen isatuani da, naisag gudanek lo pempem an ilog isou dop ninemi wo nugudani da.

¹⁰ Aria, nai gamu igo nşumiani dak, in dalawan ta ipasi panag dop anşam na nupalu wa. Saen wei mi nai ago nşumiani se ya, gug dal ta ikubiai panag man tia ya. Nap in ilon ibol tap, gamu nai ka anşam na nupalu wa.

¹¹ Nai njilan o ilog tubun mi ibol da. Man ata wo? Nai ilog lo Urgun san bar uyan ak ta ka nupanan pe lo ananem ilo rumok iganep dabai a.

¹² An mi tia ya, tia, nug san ilo rumok lo nug ilon tabisa wa. Anşam lo nai dabai njane dop, naisag lo an dam dabai anane wa.

¹³ Teig taog, an mel en ninen o anjan banau. Saen wei mi nai anşam na nupalu wo nigane se ya, ak man mel ta pempem naisag dal ifutani dugo ipalu na ya. Naisag urat nuñon an dam lulunam lo ifu o ilog ibol da, nek ibol naisag urat nuñon Juda tia yak aenta lulunad lo ifu la yak ago mi a.

¹⁴ Tamolpein wei mi sad gubun nai tinig lo yen da, an ninen o gubun an nşupasip itout a. Grik adi,

tamolpein asau adi, tamolpein manjau ad da yak, tamolpein manjau ad tia yak lo ago njigane wa.

¹⁵ Fun an lo na njasag ilog tinig fidian an tamolpein Rom na amado dan dam bilalun uyanan en nfulalep alon o ilog ibol da.

¹⁶ Nai bilalun uyanan e nabol ilasa den ninen o miai ta ifunag na da. Man dugo, Anut san dabai an lo yen da, an lo tamolpein fidian ilod lo rumok dan patud ipasi wa. Malmalan Juda adi, ago gup murna gob adi wa.

¹⁷ An ninen bilalun uyanan en lo, Anut inſen dal foun ak ta tamolpein in malan lo itaot dumado wak san igane ilasa ya. Dal an san fun, agod dal an san wadan man ilo rumok lo mi a. Nek ibol ru ta Anut san buk lo digire yan ibol, “Talpein enti in Anut malan lo itaot ak, inanen ilo rumok lo mi kumaen imado wa.”

Tan en san tamolpein fidian Anut san tinjæ mumarek paen na dumado da

¹⁸ Anut inſan tinjæ mumarek id kuai te ikubiai tile da. Anut inanen tinjæ mumarek an lo tamolpein in patud dupanig kagin saiak saiak digane dan naon ipidinai da. Man dugo, inaned kagin saiak saiak digane dan lo ru rumok ak diabi idu da.

¹⁹ Anut in enso Anut ta, inſen fun tan en san tamolpein malad lo ta imiani na ya, tia, inſen mi inanen bunun aenta kuai tem iganeg dile dulon a.

²⁰ Fun lo mok Anut tan en iganeg yen ipalug gamu saen en lo man, inſan bunun imianuk yen an walal te igane ilasa ya. An igo ya, in Anut mok a, agod inſan dabai pempem yen yau da. Mel uraru en kuai te tamolpein ka dile dulon a, inſan dabai,

agod inſan mel idiri an lo banin mitilaen ka dile wa. Ago bo man inſ Anut dumoi a. Fun amaiak niſen o inſ Anut malan lo sed idiraip itaot dilasa wo digane san dal ta yen na da.

²¹ Inſ Anut dulonſ uyanan ak bo man yaſan dia-bisa man dumoi da, agod inſ ilo uyan dupani man dam dumoi da. Ago man inſad ilo sou an nuſon an tia ya, ago dugo inſad kankan kawan ilasa ya, an lo tinid ilon lo tidom tubun an inſad ilo burau ituani a.

²² Ago dugo tamolpein an igo dubol, “Man kankan milaen amama da ya.” Ago digane dugo, sed ilod ibali dugo sed buraurau ipidinai se ya.

²³ Man ata wo? Inſ Anut kumaen pempem imado dan san girager diſane dugo, aben lo tan en san ai mitilaedi digane idu ya. Melmel nek ibol tamol, anakanak, mel mudan, agod mel mot igo yak, sad mitilaedi dusuwig ubou ad dile na ya.

²⁴ Fun an niſen o Anut yabianai a. Ago man tamolpein an nun kagin funfun a digane wo bubedi tubun mi imasa se yan, nek ago mi digane na ya. Inſ ilod imasag jeit digane dugo nug tinin lo kagin miai ak digane se ya.

²⁵ Inſ ru rumok Anut niſen o yan diſaneg patud na digane ya, ago dugo aben lo inſigned ru sewak an diganeg duri dupani na ya. An lo Anut inſen mok mi yaſan diabisa wak dumoi, melmel tan san Anut sen banin nam idiri amaiak ubou amad dile dugo yaſad diabisa na ya. Ak man Anut mi inſ mel niganag tamol, amaiak niſen o inſanen yaſan mi id pempem tabisa wa. Rumok.

²⁶ Aria, Anut inſaned kagin sisaiak ile yan niſen o, afon yabianai da ya. Ago man tamolpein an

ilo masai senamo geig ak miai san an duri dupani na ya. Pein tamol da nug iwon igo dien dan tia, in kulob Anut imoi amaiak mi diganeg in sed pein pein mi nug iwon igo digane na ya.

²⁷ Agod an mi tia ya. Tia, tamol dam in iwod pein dadi dien man dumoi, agog in bused imasag tamol tamol mi nug iwon igo dien dugo, kagin miai tubun ak mi digane na ya. An ninen o Anut nun kagin an san naon atem itaot ipidinai a, ago dop in sed tinid lo mi ai wadan an dukubiani wa.

²⁸ Taida mi, in sad ilo sou lo, in Anut dulon man mel kawan ak dubol a, an lo in sad manau Anut ninen o yan diabi sakar o dumoi dugo, banid lo ilasag ideg yau a. Fun an ninen o Anut afon yabianai da ya. Ago man in sad ilo sou saian geig an digane ilasag, an lo fun diganeg kagin sisaiak ak sensen an mi digane se ya.

²⁹ Tamolpein an in sad ilod tinid lo kagin saiak saiak en awan isa ya. Mala sek kagin, kagin saian geig ak, tura susak kagin, tamol dufuni imat ak san kagin, nug paek kagin, sewak kagin, siai kagin, nurnur kagin,

³⁰ uf kagin, Anut dile saian san kagin, silei kagin, nai-nai kagin agod se pitianoi kagin. In kulob saiak digane wo dal aban dile da, in tinad tamad awad kagin ta dupani na da.

³¹ In ninen kagin digane dak, in siganed ru ta diganuri na dak, in inaned muroud ninedi wo ta dumat na dak, agod ilo munanek amad tia ya.

³² Tamolpein an Anut san kubiaen igane yan dulon uyanan a, kubiaen an lo ibol ak talpein kulob ago igane dan maten ile wa. Rumok, in kubiaen an dulon gug dumoi, kagin uyan tia yan

mi digane yau da. Agod an mi tia, tamolpein kagin ago digane dan dile dugo dupitianai da.

2

Anut san bitinaek man itaot a

¹ Oᅇ enti talpein sen ak kagin sisaiak igane dan bitinaek lo ganeg in lo ru sue dan, dugo, oᅇ Anut malan lo kagin a gane dan fun an tia ya. Tia geig a, man dugo, oᅇ talpein sen ak ta lo ru sue yak gug, kagin sisaiak a talpein a igane dan oᅇ dam kagin naon kisaek ago gane da. Amaiak niᅇen o oᅇse bitinaek lo iginio dugo se ibio udu wau da.

² Id taloᅇ ak Anut in tamolpein kagin saiak saiak digane dan sad aupasek naon ipidinai a. Ago dop in bitinaek ago igane dan itaot fom igane da.

³ Ago man oᅇ Anut san bitinaek an lo usol ak i? Man tia ya. Oᅇ tamolkawan ak mi a, ago gug tamol aenta bitinaek lo dirai da. Ago dugo oᅇse mi inᅇsad kagin sisaiak tutuᅇani da. Fun an lo, oᅇ ilo isou dak Anut san bitinaek oᅇ iriᅇano wak i? An tia geig a!

⁴ Anut oᅇ ilon imuᅇano dugo saen milaen mi oᅇ kagin uyan uyan ak gane wo mala igane da, agod inᅇsen yabituani dop muruan ririan ta ipano na da. Dugo, oᅇ ilo lo mel an nuᅇon tia yak ubol dugo ule saian di? Anut oᅇ ilon imuᅇano san fun man, inᅇanen ilo muᅇanek kagin an lo iduduwo dop ilo bileksa wan ta ulon na i?

⁵ Ak man oᅇ bube sakar tinan a, agod oᅇane aupasek an lo ilo bileksa man umoi da. Kagin an naon man, oᅇse Anut san tiᅇae mumarek an se itumani pano da. Agod nal idu dan te dop Anut san bitinaek itaot ak malak malak ikubiaip tile wa,

saen an lo dop inſan tinſae mumarek an oſj tini fo iwali idu wa.

⁶ Talpein anen anen atem dugo dugo digane yan fom, Anut inſaned urat naon atem atem ipidinai a.

⁷ Tamolpein aenta inſaned kagin naok naok uyan ak digane yau dan lo, girager tubun ak, yaſak tubun ak, agod mateſj dile san tia yan diſane wo abaſj dile da. Anut tamol naok ago yak kumaen pempem yen yau san an ipidinai a.

⁸ Gug tamolpein aenta man, inſed titired dufuni dugo inſed uyan dumado wo digane da, ago dugo ru rumok an dumoi dugo kagin saiak saiak mi duri da. Anut tamolpein naok ago yan niſedi wo tinſaen saian geig dop, ibitiniaip inſan ilo mumarek tinid fo iwali idu wa.

⁹ Saen an lo, tamolpein fidian kagin saiak digane dan, muruan agod ilodi tinaſj anda dam ifu a, malmalan Juda adi lo ilasa gup, afon Juda tia yak adi lo dam ilasa wa.

¹⁰ Ak gug tamolpein a fidian kagin uyan uyan ak digane dan, girager, yaſak tubun ak, agod ilo maror dam diſane wa, malmalan Juda adi lo ilasa gup, afon Juda tia yak adi lo dam ilasa wa.

¹¹ Man dugo, gidad talpein ta Juda sad dar lo ilasa yan, tia, dar sen ak lo ilasa yan, Anut kagin kisaek mi lo inſ fidian ibitiniaip inſaned naon itaot atem atem ipidinai a.

¹² Tamolpein a fidian Moses san kubiaenſj amad tia aupasek digane na yan, inſ kubiaenſj amad tia dideg diau a. Nek ago mi, tamolpein a fidian Moses san kubiaenſj amad da yak gug aupasek digane dan, gidad inſ kubiaenſj amad da yak bo man inſ dam dideg diau a.

¹³ Man dugo, tamolpein a kududod nam kubiaen san ru kagin dulon ak gug awan ta diabi na dan, Anut malan lo in ta itaot na ya. Tia, tamolpein a kubiaen awan diabi dan mi ninedi wo Anut ibol ak, in itaotan a.

¹⁴ Saen tamolpein Moses san kubiaen ta diñane na dugo, inñiganed ilo sou lo mi, kubiaen an kagin itaot ak ninen ibol ago digane tap, gidad kubiaen ta diñane na yak gug, kubiaen ibol ago digane da. Rumok, in Moses san kubiaen amad tia ya, ago bo man inñsed kubiaen amad da ya, ago dugo inñiganed kubiaen an diri da.

¹⁵ Inñsad kagin naok naok lo talon ak, Moses san kubiaen inñanen ru kagin funfun an bubed lo digire yak yen da. An lo inñiganed ilo sou naon sensen an lo ru kagin irupidai da, saen ta muruan ipidinai dak, saen ta isatuanai da.

¹⁶ Awo, nal ta ilasa dop tamolpein a kubiaen dulon gug patud dupani dan, agod tamolpein a kubiaen diganuri dan, in sisem Anut naon na bitinaek lo ditur a. Bilalun uyan ak a ñai ñabol ilasa dan lo ibol ak igo, nal an lo dop Anut tamolpein sad kankan mianuk an fidian Jesus Kristus lo kuai te idiri ilasap ibitinae a.

Juda adi in kubiaen ad da yak gug dupilali na ya

¹⁷ Gug on, on Juda tamol ubol tap, agod kubiaen mi uri pani tap, agod on Anut ulon ubol go se ipitiano tap,

¹⁸ on inñsan ilobol ulon ubol tap, mel uyan uyan kubiaen ipitenano dan ninen awok pidinai tap,

19 on onse isisiñanop on mala tiai adi titianai dak ubol tap, agod on tamolpein tidom tubun dumado dan lilaman pidinai dak ubol tap,

20 on tamol burau ak sad ulumbek tamol ubol, agod on nanuk sad girek mañau mado dak ubol tap, agod on kubiaen ilon lo mi mañau mok ak in ru rumok da yen dugo ule ulon ak ubol tap,

21 aria, on aenta piteñanai da, gug on se ipiteñano di? On gumagam kagin dumoi o ubol da, ak dugo, onse ta ugam na di?

22 On aenta jeit kagin digane dumoi o rupidai da, ak dugo, onse jeit ta gane na di? On tubud sewak ai mitilaen man umoi da, ak dugo, on gob sad ubou ab lo mel uyan uyan ak ta ugam na di?

23 On Anut san kubiaen niñen o ru tubun mi ubol da. Gug on kubiaen an pilalig an lo Anut miai pani da. Dugo, an ta rumok na i?

24 Nek ru girek lo ibol ago, “Ansam kagin sisaiak niñen o gob adi lulunad lo tamolpein Anut yanjan niñen o nao futek ru diñen da.”

25 Saen on kubiaen kagin pani yau dan, on tini suñulon dutute san kagin an nuñon anda ya. Gug saen on kubiaen pilali man, onsa tini suñulon tutek an mel kawan igo ilasa ya.

26 Nek ago mi, talpein ta gidad tinin suñulon ta dutute na bo man kubiaen ibol ago igane dan man, en dugo, in tinin suñulon dutute yak ago Anut ilon ta isou na wak i? Rumok geig, Anut san leil lo talpein an man nek ibol tamol tinin suñulon dutute yak igo won a.

27 Amaiak niñen o tamol a tinin suñulon ta dutute na bo man kubiaen kagin ipani dan, in on kot

ipano dop ibio udu wa. Ata wo? On kubiaen muroun mado dugo, tini suñulon tutek san kagin inñsan muroun dam mado da, ak gug kubiaen nek an pilali da.

²⁸ Kagin an ipalug wadan lo enti inñ Juda tamol mok tabol ak i? Tamol a tini suñulon tutek san muluñ yabi dan, kagin an lo mi inñ Juda tamol mok ilasa san ta idaisuda na ya. Agod tini suñulon tutek mok man, mel ta tamol banid nam digane san dam tia ya.

²⁹ Tia, tamol ta Juda mok imado man an ñutun san, agod tini suñulon tutek mok man, an bubed ilon san mel, an dam ur san mel, gug an kubiaen san mel tia ya. Tamol naok ago yak inñ Anut san na yanak tubun ak inñane wo ilon ibol da, tamol sad na man tia ya.

3

Anut san bitinaek an itaot a

¹ Aria, dal dugon lo Juda inñ tamolpein aenta dirinñanai i? En ata mel uyan tini suñulon tutek diñane dan lo ilasa i?

² Awo, inñ Juda dilasa yan lo man inñsad binawek wei mi a. Mel malan malan man igo ya, Anut inñanen awan aban an kagin dupani uyan o banid lo igane ya.

³ Gug Juda adi aenta ilod ta rumok na yak ninen o dugo yak i? Dugo, inñ ilod ta rumok na yan lo Anut inñsinanen ru iganuri dan nuñon tia yak igane ilasa wak i?

⁴ Man tia mok a. Gidad tamol adi fidian sewak bo man Anut man ago tia ya, tia, inñ pempem rumok a. Ru ta Anut san buk lo igo ibol,

“Saen oŋ ru ubol ilasa dop, tamolpein fidian kuai tem dile wak oŋane ru an itaot a, ago dop oŋ bitinaek lo udu bo man, bitinaek an oŋ riŋani wa.”

⁵ An niŋen o idsad kagin a ta itaot na yan lo, Anut iŋanen kagin itaot ak kuai te igane ilasa da. An lo dop, id dugo tabol ak i? Dugo, Anut iŋanen tiŋae mumarek id tinid fo igane dan ta itaot na i? (Ru e ŋabol den niŋen o, tan en san tamol adi sad ilo sou ŋirig sumiaek ago ŋigane da.)

⁶ Man tia geig a! Uloŋ. Anut iŋsen ta itaot na tap, en dugo woŋ pe iŋ tan en san tamolpein fidian bitinaek lo idirai san idaisuda wak i?

⁷ Gug talpein ta ru naon en ka irupaiaŋ, “Ŋaisag kagin sewak lo Anut san kagin rumok ak igane kuai te ilasap an lo iŋsan girager an awana da. An rumok tap, ata wo Anut kot ipanag dop ŋaisag aupasek an niŋen o ŋai ibiag ŋadu wak i?”

⁸ Id talpein naok an san ru ta tiganuri na wa, kabelan iŋ afon ru igo ibol banau, “Id kagin saian ak tiganep, an lo nuŋon uyan ak ka ilasa wa.” Maŋ ru naok ago yan mabol ilasa dak ago tamolpein aenta dubol da. Ago yan lo maŋ niŋema wo uf digane dugo, yaŋama dipitiŋini da. Anut tamolpein a maŋ niŋema wo ago dubol dan, kot ipidinaip ibiai idu saian geig a, man dugo, iŋ ago diŋane san idaisuda geig a.

Talpein ta itaot man tia ya

⁹ En dugo, id Juda adi tamolpein aenta a Juda tia yan tiriŋanai ak i? Man tia geig a. Ŋai gubak mi ŋukubiaig ale la ya, Juda tamolpein agod a Juda tia yan dam aupasek san dabai paen na tumado da.

- 10 Ru ta Anut san buk lo igo ibol,
 “Tamolpein fidian ta itaot na ya, ta kisaek dam tia ya.
- 11 Talpein ta kankan milaen aman da man tia ya,
 agod talpein ta Anut abanjan ta yabi na da.
- 12 Tamol fidian mi Anut patud dupanig,
 in fidian sisem tamol mok tia ago dilasa ya.
 In lulunad lo tamol ta kisaek kagin uyan ak ta igane na da.
 Rumok, ta kisaek tia ya.”
- 13 “Injad awadi man materjan san,
 agod in baled fo ru raek saian geig ak ikirir da.”
 “Inaned awad aban farid lo ilasa dan nek ibol mot wagai ak san awan uran igo won a.”
- 14 “Inaned awad man misilane ru in ru saiak siai lo ilasa dan da awan isa ya.”
- 15 “In bani malak kagin lo, tamolpein tinid dipitini dak, dufu dumat da.
- 16 In dutor dugo injad njiek aban fo man, madok pitininek, agod ilo tinan madai da ago ilasa yau dop diau da.
- 17 In maror san dal, kagin an ta dulon na ya.”
- 18 “Agod Anut ninen o durut direr san tinid ta ilon na ya.”
- 19 Aria, id talon ak, Moses san kubiaen dugo ibol dan, ru kagin an tamolpein a kubiaen an paen na dumado dan mi irupidai dulon a. Awo, Juda adi in Juda tia yak adi da aupasek paen na dumado da. An lo dop saen Anut ru ipidinai dop sed ibargiranai san ta idaisuda na ya, tia, tan en san tamolpein fidian Anut san bitinaek lo dutur dop ru naon durupeia.

²⁰ Amaiak ninjen o talpein ta kubiaen an iri pani dan lo Anut malan lo itaot ta ilasa na wa. Tia, id kubiaen an lo mi dop idsiganed aupasek tile talon a.

Ilo rumok lo id itaot tilasa wa

²¹ Ak gug, gamu Anut in malan lo itaot idirad san dal foun ak iganeg walal te ilasag yen da, ago dugo id an tile talon a. Id itaot tilasa san dal an kubiaen san dabai lo ilasa man tia ya. Gug Moses san kubiaen in profet adi da awad kisaek go mel an ninjen dubol ilasa ya.

²² Id itaot tilasa man Anut idsad ilo rumok Jesus Kristus lo ipanad a. Id fidian Jesus Kristus ilod lo rumok dan, an tinjane wa. Id fidian, Juda adi, agod Juda tia yak dam naon kisaek mi a,

²³ man dugo, id fidian aupasek tigane na ya. Ago dugo idsad nao lalek man Anut anen nao lalek ago tia ya, tia, id fidian ta idaisuda na ya.

²⁴ Ak gug Anut injanen ilo panek lo sen kawan naon tia idirad go itaot tilasa ya. In Jesus Kristus idinig id idad injiliad o ipalu ya.

²⁵ Anut, Jesus Kristus nek ibol mel ta inſan tinjane saiak igane itout san igo won, id naod na ikubiaig tile ya. Id in ninjen o ilod rumok dan lo, Anut san tinjane saiak Kristus san dar lo ikubune itout an, san nunjon id tinjane wa. In ago igane yak lo kagin itaot an ikubiaig id fidian tile ya. Man dugo, Anut sen itaot ago mi ipiranig tamolpein gubak mi dumado dan sad aupasek ile bo man naon ta ipidinai se na ya.

²⁶ Fun in ago igane man, saen gamu en lo inſen bitinaek lo kagin itaot ak mi igane dan id ikubiaip

tile wa, agod in talpein a Jesus o ilon rumok dan itaot igane ilasa wa.

²⁷ Dugo, id an lo ka sed ipitianad ak i? Kagin naok ago man fun tia ya. Ata wo? Id Moses san kubiaen kagin tupani dak lo yak i? Tia geig a. Id Jesus ninen o ilod lo rumok da, nek fun an mi a.

²⁸ Man dugo, id igo tabol, tamol ta inſan ilo rumok an lo mi Anut iganep itaot ilasa wa, kubiaen san nouk nouk ago kagin igane dan lo tia ya.

²⁹ Dugo, Anut in Juda mi sad Anut i? Ago dugo, Juda tia yak sad Anut tia i? Tia, in Juda tia yak sad Anut dam mi a.

³⁰ Man ata wo? Anut inſen kisaek mi a, fun an ninen o inſen tamolpein fidian sad Anut. Amaiak ninen o dal kisaek lo mi in tamolpein itaot idirai dilasa da, gidad in tini sunulon tutek amad da yan, tia, tini sunulon tutek amad tia yan, Anut in fidian anen anen atem inaned ilo rumok Jesus lo yan itaot idirai dilasa wa.

³¹ Ago man id ilo rumok san dal an mi turi wo tabol da. An fun man dugo? Moses san kubiaen tabianip nunon tia ilasa wak ago tabol di? Man tia geig a! Tia, idsad ninen en lo kubiaen an tibalsinani da.

4

Abraham in ilon lo rumok an lo itaot ilasa ya

¹ Amaiak ninen o Abraham man in man Juda sama tubum bagem, tamol amaiak ninen o id dugo tabol ak i? In mel a ninen o imug mabol ilasa se yan dugon kuai ipani ak i?

² Abraham kubiaen ibol ago mi iganeg an lo Anut malan lo itaot ilasa yan rumok tap, in ka sen

ipitiani wa, gug Anut naon na man ago igane san tia ya.

³ Ru Anut san buk lo dugo ibol i? “Abraham Anut san ru niñen o ilon rumok a, fun an lo Anut Abraham inñ tamol itaot ak ago ibol a.”

⁴ Saen talpein urat igane dugo inñsan urat naon dupani an niñen lou kawan ak ago ta tabol na da. Tia, inñsan gubun* urat muroun tinid lo amaiak mi dukubune wa.

⁵ Ago gug tamol enti inñ urat ta igane na dan inñ Anut san ru mi ilon lo rumok tap, Anut inñsan ilo rumok ilep malan lo itaot ak ibol a. Man dugo, Anut sen tamol saiadi ak idiraip itaot dilasa wak san Anut.

⁶ Kin Dawid dam inñ mel naon kisaek an mi niñen o ibol a. Dawid inñ tamol a inñsan urat naon Anut ipani man tia yak gug, Anut iganeg itaot ilasa yan niñen o bar igire ya. Inñ tamol an san ilo uyan niñen o igo ibol,

⁷ “Tamolpein ensauta a Anut inñsad aupasek ipare idu dugo,
inñsad muruan ituani an, ilod uyanan a.

⁸ Talpein enti Anut inñsan aupasek ilon ta isou na dan, inñ bar uyanan inñane ya.”

⁹ Dugo, ilo uyan san bar uyanan an tamol tinid sunñulon dutute yan inñsad mi ak i? Tia, tamol tinid sunñulon ta dutute na yan dam sadi a. Man dugo, manñ Anut inñsen Abraham itaotan ibol an niñen o mabol da. Anut ago igane man lou kawan ak onñ pani a.

¹⁰ Saen dugon lo inñ ago igane i? Inñ tinin sunñulon dutute gug ago igane i? Tia, tinin sunñulon gamugo

* **4:4:** Pani

dutute dugo ago igane yak i? Kulob an tinin suñulon dutute gug lo ta ilasa na ya, tia, kulob an o gubak mi yen la ya.

¹¹ Inj tinin suñulon gamugo dutute bo man, inj ilon lo rumok ak lo inj tamol itaotan ak imado ya. Amaiak lo inj tinin suñulon dutute yan san kob injane ya, Anut inj tamol itaotan ibol an lo kob an kuai isi a. Dal an lo tamolpein fidian a ilod lo rumok gug tinid suñulon ta dutute na yan gidad, Abraham Anut inj idiraig itaot dilasa yan, inşad tamad imado ya.

¹² Nek ago mi, inj dam tamol a tinid suñulon dutute yan tamad imado da. Gug inj tini suñulon tutek mi ta diñane na da, tia, inj Abraham san ilo rumok naok igo yan dam diganuri da. Abraham gamugo tinin suñulon dutute dugo, Anut san ru inj ilon lo rumok a, ilo rumok naon kisaek an mi inj dam da ya.

¹³ Kubiaen lo Abraham injanen malan kubulan dadi Anut san promis ta diñane na ya. Promis an Anut tan en, agod fidian tan ilon lo dien dan dam, ipidinai ak ibol a. Ak gug Abraham san saen lo kubiaen an ta yen na ya, ago yan lo inj kubiaen an iganuri san tia ya, amaiak ninjen o dal an lo promis injane san tia ya. Tia, inj ilo rumok anda yak lo itaot ilasa ya, kagin an ninjen o mi Anut promis an ipani a.

¹⁴ Man dugo, tamolpein a kubiaen diganuri dan mi memel an diñane dop man, ilo rumok an dabai an tia ya, agod promis an nuñon tia wa.

¹⁵ Man ata wo? Kubiaen inj Anut san tiñae mumarek isini ipalu da. Ak gug, kubiaen tia dop man tamol kubiaen ipilali ak ninjen o tabol san tia ya.

16 Fun an niñen o promis an ilo rumok lo mi ipalu ya. Ilo panek in̄j promis an san fun, man dugo, Anut sinan ilo panek lo mi Abraham promis an irupei a. Fun an lo promis an san nuñon ilasag Abraham san malan kubulan fidian diñane ya. An tamolpein a kubiaen̄j duganuri dan mi tia ya, tia, a in̄j Abraham san ilo rumok lo dutor dan dam promis an diñane ya. Ata wo? Abraham in̄j id tamolpein naok naok fidian sad ilo rumok tamad a.

17 Nek ru ta Anut san buk lo yen dan ago ibol, “Ñai on̄j tan titin wei mi san tamolpein in̄jsad tamadi ñipiliano ya.” Ago man in̄j Anut malan lo idsad tamad imado da. Man dugo, in̄j Anut ilon lo rumok a. Anut an enti mok ak i? Enti a tamol imat ak kumaen ipidinai dan, agod melmel ta dilasa na yan yañad ipate dugo ago dilasa yan, nek Anut an mi niñen o Abraham ilon rumok a.

18 Abraham in̄j ilon lo rumok a, gidad malan iganeg mel an nuñon tia yak igo bo man, in̄j mala nouk imado se ya. An niñen o in̄j tan titin wei mi sad tamad ilasa ya, in̄j o ago ilasa wan niñen o Anut gubak mi igo irupei, “On̄jane mala kubulan sad sutek man lon̄j na lul igo won̄j dilasap ago dumado yau a.”

19 In̄j muruan en ileg ikubiani a, in̄jsan tinin san dabai itout o sumeik da, ago bo man in̄jsan ilo rumok ibisei san tia ya. In̄jsan anañar 100 sumeik da, agod Sara san nanuk tañen dam ikukuik a.

20 Ago bo man in̄j Anut san promis ta ibisei nag ilon dam weiwei man tia ya. Tia, in̄jsan ilo rumok isudag dabai geig an lo dabai ipani dugo Anut yañan yabisa se ya.

²¹ Man dugo, inſan ilo rumok tubun an lo inſ ilon ta weiwei na ya, tia, Anut inſ dabai anda an lo mel ibol an ago ka igane wak, nek ago ilon isou se ya.

²² Fun an lo “Anut Abraham inſ tamol itaotan ak ibol a.”

²³ Ru e, “Anut Abraham inſ tamol itaotan ak ibol an” Abraham niſen o mi ta digire na ya.

²⁴ Tia, id dam niſed o digire ya. Man dugo, id dam Anut binawek kawan an ipanad pe lo id tamolpein itaotan ak ibol a. Id Anut e idsad Tubun ak Jesus mateſ lo ifufunig kumaen imasa yen niſen o ilod rumok a, fun an lo inſ binawek kawan ak ipanad pe itaot tumado wa.

²⁵ Anut inſ Jesus ibiseig idsad aupasek isuas o mateſ lo igane yau a, agod id iginiad itaot tilasa wo Jesus mateſ lo ifufuni yabisag afon kumaen imado da.

5

Kristus id patud ipasig gamu youd isa da

¹ Fun an niſen o, Anut idsad ilo rumok amaiak lo itaot idirad tilasa ya. Amaiak niſen o id idsad Tubun ak Jesus Kristus lo id Anut da ilo maror lo tumado da.

² Jesus inſen mi idsad dal an lo, id Anut anen ilo panek san ar ilon lo tiladu ya, agod dugo ilo panek an lo tatur da. Agod id Anut da sisem inſan girager an lo tumado wak niſen o mala nouk tumado dugo uyasusai tigane da.

³ Agod an mi tia, muruan tinid fo ipalu bo man uyasusai tigane da. An lo id taloſ ak, muruan tisini den inſan wadan man, id dabai ipanad pe tatur sakar a.

⁴ Aria, tatur sakar san kagin san wadan man, id ilod lo bunud uyanan igane ilasa wa. Agod bunud uyanan san wadan man, mala nouk tumado san kagin igane ilasa da.

⁵ Agod id mala nouk tumado dan san kagin an nuḡon da ya, kagin an niḡen o id ilod ta muruan na da. Tia geig a. Man dugo, Anut Awan Urgun id ipanad an lo iḡanen ilo panek id bubed lo ikulmaek la ya.

⁶ Saen id dabai amad tiag, sed ibinawad san tia yan lo Anut ibinawad a. Nal nek an lo Kristus tamolpein Anut awan duparsisali an ibinawai san niḡedi wo mateḡ ile ya.

⁷ Talpein ta iḡ tamol itaot ak aben iḡanep imat san niḡen o irer mok a. Saen wei mi tamol ta ago igane dop tile man tia ya. Ak gug, nap talpein ta tamol uyan mok ak mi aben iḡanep ka imat san niḡen o irer san tia yak boi.

⁸ Ak man Anut anen ilo panek tubun ak dal en lo ikubiai tile da. Saen id aupasek san dal turi dugo Kristus id niḡed o mateḡ ile ya.

⁹ Gamu iḡsan dar lo id itaot idirad tilasa ya. Amaiak niḡen o rumok, murnap Kristus iḡsen id patud ipasi dop, Anut tiḡae mumarek an lo ta ifunad na wa.

¹⁰ Saen id Anut san ager tumado dugo iḡanen Nanun san mateḡ lo id Anut san turan muroun tilasa ya. An rumok tap, sapita taida dop iḡ gamu kumaen imado dan lo id ibinawad pe patud ipasi wa.

¹¹ An mi tia ya, idsad Tubun ak Jesus Kristus lo, id Anut da tutumani an niḡen o yousai tigane da. Man dugo, gamu Kristus lo id Anut da titiḡae mi

siai yen an ipasi panad go Anut san turan muroun tilasag tumado da.

Id Adam lo tamat ak gug Kristus lo kumaen tijane ya

¹² Aria, ru en alon uyan. Tamol kisaek lo aupasek tan ente isadu ya. Agod inſan aupasek an materſ dam isinig ipalu ya. Dal an lo materſ an tamolpein fidian lo yau a. Man dugo, tamolpein fidian tamol kisaek an dututuſanig au dupas a.

¹³ Rumok, Anut san kubiaenſ Moses gamugo ipani dugo, saen an lo tamolpein au dupas na ya. Ak man saen kubiaenſ tia dop, aupasek niſen o Anut talpein ta tinin ta isupale na wa.

¹⁴ Ak gug gidad, Adam san saen lo yaug Moses san saen lo man materſ mi ititianad na ya. Nek ago mi, tamolpein a inſad aupasek Adam san aupasek igo mi tia yan, materſ dam ititianai na ya. Aria, alon uyan, Adam man inſ Tamol a murnap ilasa wan san mitilaen igo wonſ a.

¹⁵ Ak man, Adam san aupasek, Anut san ilo muſanek da sad nuſon naon kisaek tia ya. Tia, tamol kisaek an san aupasek amaiak lo tamolpein wei mi dumat na ya. Gug Anut san ilo muſanek man tubun di tubun geig a. Anut san ilo muſanek an lo mi binawek kawan ipanad man, nek tamol kisaek Jesus Kristus mi a. Binawek an san nuſon man Anut san ilo muſanek tamolpein wei mi diſane se ya.

¹⁶ Agod ſai fon igo ſabol, Anut san binawek kawan an, tamol kisaek san aupasek an da, nuſon naon kisaek ta digane ilasa na ya. Tia, tamol kisaek an san aupasek an lo Anut anen bitinaek

ilasag, tamolpein fidian ibiai dudu ya. Ak gug, gidad aupasek wei mi ilasa bo man, ilo muḅanek kawan an id Anut malan lo itaot idirad a, an ninen o id aupasek san naon muruan ipanad san tia ya.

¹⁷ Aria, tamol kisaek an san aupasek lo, materḅ tamolpein fidian sad gurman imado tap, rumok geig, tamol kisaek nek Jesus Kristus lo mi, tamolpein a Anut san ilo muḅanek tubun ak diḅane, agod binawek kawan a Anut malan lo itaot idirai san diḅane yan dam lo, kumaen panu na Kristus paen na gurman dumado wa.

¹⁸ Aria, aupasek kisaek an naon Anut tamolpein fidian bitinaek lo ibiai dudu ya. Nek ago mi, tamol kisaek san kulob itaot an san nuḅon igo ya, Anut malan lo itaot idirai san dal in lo ilasa da. Amaiak lo tamolpein fidian mi kumaen dumado san ka diḅane wa.

¹⁹ Ago mi, tamol kisaek awa parsisalek igane yan lo, tamolpein fidian aupasek digane yau oḅ se ya. Nek ago mi, tamol kisaek awa biek uyanan igane an naon, tamolpein wei mi ibinawaip, mur- nap Anut malan lo itaot idirai dilasa wa.

²⁰ Anut kubiaenḅ Moses ipani an dugo wak i? Inḅ kubiaenḅ a ipani man fun, aupasek naok wei mi kuai te ilasa wa. Ak gug, saen aupasek tubun ilasa dugo, nek saen an lo mi ilo muḅanek dam ilasag tubun geig go aupasek san dabai irinḅani a.

²¹ Ago man, nek ibol aupasek itirnad go materḅ igane ilasa yak igo woḅ, gamu id Anut malan lo itaot tumado dan lo, inḅsan ilo muḅanek ibuluwad pe itirnad dop kumaen yen yau san an idsad Tubun ak Jesus Kristus lo tinḅane wa.

6

An aupasek patum apani dop afon ta itirnan na wa

¹ Ago yak ninen o id dugo ilod isou dak i? Dugo, id kagin saian an fon mi tigane yau dop lo Anut inanen ilo mujanek an nal pempem mi ka ikubiai panad ak i?

² Ago tia mok! Dugo, id Kristus da maten lo aupasek san dabai tirinani dop man, aupasek ka tigane yau on ak i? Man tia ya.

³ Dugo, on en ilo inanon i? Id fidian Jesus Kristus yan lo suguek tinane yan, nek suguek an lo mi id in da sisem tamat a.

⁴ Fun amaiak ninen o idsad suguek an lo id in da maten san gib lo disiriad a. Amaiak lo nek ibol Kristus Taman san girager tuon lo yabisag imasa yak igo won, nek ago mi id dam kumaen foun amad da tator a.

⁵ Man dugo, in san maten naon kisaek an lo id in da tutumani tap, in san kumaen naok a foun inane yan lo id in da tutumani mok a.

⁶ Agod id en dam talon a. Saen Kristus aigim fo iyuk an idsad bunud wagam an aigim fo da dutumanig dubali a. Dal an lo idsad tinid aupasek aman da yan ipitininig, an lo aupasek san urat pinein tumado yau san tia ya.

⁷ Man ata wo? Talpein enti imat la yan aupasek san dabai in yabitanip yen yau san tia ya.

⁸ Aria, id Kristus da tamat tap, id ilod lo rumok pe in da sisem kumaen tumado wa.

⁹ Man ata wo? Id talon ak saen Kristus mutou lo imasa yan, fon imat san man tia ya. Maten fon in tinin itirni san dam tia ya.

¹⁰ Matenj a ile yan ninjen o nabol da. Id fidian aupasek tigane na yan ninjen o matenj an ile ya. An ninjen o inj imat kisaek o lian an lo aupasek san dabai igane itout a. An lo tamolpein fidian ibinawai o ago igane ya. Gug gamu inj kumaen imado da, agod Anut san ilobol lo mi iri wo ago imado da.

¹¹ Nek ago mi, ansem ninjemi wo ilo sou igo agane wa. Aupasek fon anj ilom ta injane na wa, man dugo, anj nek ibol tamol imat la yak igo wonj a. Ak gug Anut ninjen o, ansem nek igo ilianj a, Jesus Kristus lo Anut san ilobol ari wo kumaen amado dak abol a.

¹² Amaiak ninjen o, aupasek abiani ilasa yau dop anjanem tinim apirani wa. Ago tap, saen anj tinim imasa bo man, anj tinimi san ilobol awan abi san tia ya.

¹³ Anjanem njem banim nek ibol kagin saiak digane dak san biouj igo wonj, aupasek igane wo ta apani na wa. Tia, ansem tamol mutou lo dumasag kumaen dumado dak igo wonj, anjanem tinim fidian mi kagin uyan digane dak san biouj igo wonj, Anut apani wa.

¹⁴ Anj kubiaen paen na ta amado na da, tia, anj ilo mujanek paen na amado da. An lo afon aupasek anjam titianek tamol ta imado na wa.

Id kagin itaot ak san urat bigabeg tilasa wa

¹⁵ An ago tap, en dugo wak i? Rumok, id man kubiaen paen na ta tumado na da, ago gug Anut san ilo mujanek paen na tumado da. Amaiak ninjen o dugo, id aupasek an nek ago mi ka tigane yau ak i? Man tia geig a!

¹⁶ Ansem talpein ta tuon lo sem injilian pe aup bigabeg igo inſan awan ari tap, tamol e inſan awan aloſ den inſan bigabeg igo mok amado wa. Amaiak niſen o, ansem aupasek tuon lo idiraſ au tap, an nuſon man mateſ mi a. Aria, ansem injilian pe awa biek kagin san tuon lo au tap, an nuſon man Anut malan lo itaot idiraſ a.

¹⁷ Gug Anut ilo uyan tupani da. Man dugo, an wagam aupasek san bigabeg amado ya, gug gamu pitejanek a imug aloſ an bubem űutum fidian lo ananeg ari dugo paen na amado yau oſ a.

¹⁸ Agod an aupasek lo Kristus injilian go kuai te idiraſ a. An lo an kagin itaot agane san bigabeg adi alasa ya.

¹⁹ Nai űaisag ru lo, an ilom tia yak niſen o tamol kagin űurig űabol da. An wagam ananem tinim san biabi anen anen, aupasek san bigabeg igo aganeg dilasa ya. Ago yan lo an kagin sisaiak nun anda yak agane se ya. Nek ago mi gamu ananem tinim san biabi anen anen aganep, kagin itaot ak san urat bigabeg alasa dop gun amado wa.

²⁰ Saen an aupasek san bigabeg ago ator se man, kagin itaot an an ibiatuanan san tia ya.

²¹ Gug an melmel a niſedi wo gamu miai ifunan dan nuſon dugo anane yak i? Mel an san wadan man mateſ mi a.

²² Gug gamu Kristus an aupasek lo ipasaſ go Anut san bigabeg alasa ya. An san nuſon man in an gun idiraſ alasa ya. Agod an san nuſon man kumaen pempem yen san mi a.

²³ Aupasek san ai wadan man mateſ mi a. Gug Anut san binawek kawan ipanad dan man id Jesus Kristus idsad Tubun ak da tutumanip, in lo

kumaen pempem tumado wa.

7

Moses san kubiaen san ru fanan

¹ O ηai teig taog, kududom agure. Gamu an tamolpein a Moses san kubiaen alon an, ηai ru en ηurupaian dop alon a. An mel en ta alon na yak i? Talpein ta Moses san kubiaen paen na imado dan, kubiaen an isubani da, ak man saen in tan en lo imado den lo mi a.

² Pein iwon anda yak lo ilom isou, saen iwon tamol ak ta imat na dop man, in sisem kubiaen itumanaig dumado da. Gug tamol an imat dop, an lo kubiaen a pein isubanig iwon da dumado yan itufalak a.

³ An lo, iwon tamol an malan kumaen imado dugo, tamol sen ak ta ida ditor tap man, in jeit pein ak ago dubol a. Gug iwon tamol an imat pasik dop, kubiaen a lo in imado yan itufalak a. Saen an lo tamol ta inane dop man, in jeit san pein tia ya.

⁴ Amaiak lo an dugo wak i? Nai teig taog, Jesus Kristus tinin lo, an dam Moses san kubiaen paen na amado yan atufalak pe mel sen ta san muroun amado wa. Anut tamol ta mateη lo ifufunig yabisa ya, an lo id Anut damon lo ai patun igo ilo rumok tamolpein foun ak igo won tidirai dilasap nunod ifu wa. Aria, id tamol an muroun mi tumado wa.

⁵ Saen id tamolpein tan en san igo tumado yan, aupasek san subam saiak id tinid ilon lo imado ya. Moses san kubiaen subam an igane ilasag dabai ipani a. Subam an id tinid san samun lulunad lo dabai igane da, an lo nunon a iganeg ilasa yan man mateη san mel mi a.

⁶ Ak gug gamu kubiaen an lo id isubanad san tia ya. Kubiaen a gubak mi isubanad na yan gamu ta ibiatuanad na da, man dugo, id tamol dumat la yak igo won tumado da. Ata wo, id talon ak tamol a imat la yan kubiaen kagin ipani san tia ya. Ago dop an lo id ru girek wagam ak paen na Anut san urat ta tigane na wa, tia, Awan Urgan san kumaen foun ak lo urat tigane wa.

Id aupasek da nug tabi tidiri da

⁷ An ninen o id dugo tabol a, Moses san kubiaen an aupasek ak i? Tia geig a! Kubiaen tia yak man, nai aupasek ta nalon na wa. Kubiaen ago ibol, “On mala ta isi na wa.” Kubiaen ago ta ibol na tap, en dugo won nai mala isek fun nalon ak i?

⁸ Alon ak, saen kubiaen tia yak man, aupasek an susanun igo dabai itaot pe kawan yen a. Ak dugo, aupasek malan kumaen imado tap, aupasek an kubiaen lo dal ileg, nai ilog lo mala isek san kagin wei mi ifufunaig dumasa da.

⁹ Saen nai nanuk on nator na man, nai kubiaen amag tia yak igo kumaeg nator a. Gug saen kubiaen ipalu yan lo man, aupasek an kumaen imasag, an lo nai nmat a.

¹⁰ Kubiaen a nai kumaen ipanag ago ilog isou se yan, nai mel en kuai npani ak, kubiaen nek an maten ipanag a.

¹¹ Man dugo, aupasek in kubiaen an lo dal ileg lo nai irawag a, ago dugo kubiaen nek an nai ifunag nmat a.

¹² An ninen o Moses san kubiaen gun mok a. Agod an san pitenek funfun an dam gun, itaot, agod uyanan mok a.

13 Rumok, kubiaen uyanan a. An ninen o kubiaen uyanan an lo naisag mater igane ilasa wak i? Tia geig a. Rumok, kubiaen man mel uyanan mi a, ak man aupasek in mi kubiaen an lo mater naj tinig lo igane ilasa da. Amaiak lo naj nile nalon ak aupasek man aupasek mi a. Agod kubiaen lo aupasek naj malag lo man saian di saian geig a.

Aupasek idsad madok itirni da

14 Aria, id fidian talon ak kubiaen man in Anut san a. Gug naj man tinig tan en san mi a. An lo aupasek naj ilog tinig bigabeg igo won idad a, agog aupasek san bigabeg igo numado nator da.

15 Nai dugo ngane duman, fun ta nalon uyan na ya. Kagin aenta naj namoi dan, gidad, an fidian ngane da. Nai aupasek san ager numado bo man naj aupasek ngane yau on da.

16 Aria, mel a namoi an naj ngane tap, naj ilog lo mel dugo uyan ak ninen o nabol dan, agod mel dugo kubiaen ibol dan, an mel kisaek mi a. Amaiak ninen o naj nalon ak kubiaen man uyan a.

17 An lo gug, naiseg mi fon ta ngane na da, tia, aupasek naj bubeg lo amaiak isubanag go ilon dugo ibol an mi nuri da.

18 Agod naj nalon ak, naj ilog lo mel uyan ak ta yen man tia ya. (Nek naisag tan en san tinig ninen o mi nabol da.) Nai mel uyan ak ngane wo ilog ibol dan naisag ilo sou lo yen da, ago gug dugo won mel an ngane san dal nile man tia ya.

19 Nai mel uyan ak ngane wo ilog ibol dan naj ta ngane na da. Tia, kagin saiak ngane wo ilog ta ibol na dan mi ngane yau da.

²⁰ Amaiak ninjen o naj mel njamoi ak njigane tap, njaiseg ilog nam ta njigane na da, tia, aupasek a ilog lo yen dan, naj ilog iduduwi dan lo, naj aupasek ago njigane yau dop na wa.

²¹ An lo naj tinig ilon lo kubiaen en njile njalon da, saen naj mel uyan ak ta njigane wo ilog ibol dop, kagin saiak dam naj isaurag da.

²² Rumok, naj bubeg ilon lo man, Anut san kubiaen o ilog bulbal da.

²³ Ak gug, naj kubiaen naon sen ak tinig ilon lo dabai igane dan njile njalon da. Kubiaen an in njaisag ilobol san kubiaen da nug dufuni da. An lo dop aupasek san kubiaen e tinig ilon lo dabai igane den naj isubanag da.

²⁴ O kabel, naj muruan sinek tamol mi a! Enti tinig materj san en lo naj patug ipasi wak i?

²⁵ Jesus Kristus idsad Tubun ak lo naj Anut ilo uyan njupani da, man dugo, Anut injen naj patug ipasi wa. Aria, naj njaisag ilobol lo Anut san kubiaen ninjen o dabai njigane da, ago gug njaiseg tinig lo man aupasek san kubiaen ninjen o mi dabai njigane da.

8

Awan Urgun lo id kumaen tumado da

¹ Amaiak ninjen o gamu tamolpein Jesus Kristus lo dumado den, Anut aupasek san naon muruan ta ipidinai na da.

² Man dugo, id tamolpein Jesus Kristus da tumado den kubiaen foun en paen na tumado da. Kubiaen en man kumaen san Ur igane ya. Aria, kubiaen en id aupasek materj da sad kubiaen lo isubanad an kuai fo idirad tilasa ya.

³ Mel a Moses san kubiaen igane san ta idaisuda na yan, Anut inſen mi igane ya. Man dugo, id tinid aupasek aman da yan lo kubiaen an dabai aman tia ya. Amaiak ninen o, Anut inanen Nanun idinig ipalu yan lo, tan en san aupasek a tinid lo yen an ipare idu ya. Fun an ninen o, inſan tinin man nek ibol idsad tinid tan en san igo mi a, agod inſen tinin nek ibol mel mudan ak Anut o dufuni imat pe an lo aupasek dusuas ak igo won ilasa ya.

⁴ Anut ago igane yan lo kubiaen san pitenanek itaot an fidian id lo awan isag yen da. Man dugo, id tinid san ilobol lo ta tator na da, tia, Ur san ilobol lo mi tator da.

⁵ En sauta inaned ilod ibol dak lo dumado dan, in inaned tinidi san biouen o ilo sou digane da. Gug en sauta Ur san ilobol duri dan, Ur san biouen o mi ilo sou digane da.

⁶ Talpein ta sen tinin o mi ilon isou dan, in mater lo idu wa. Gug talpein ta Ur san ilo sou iri dan, in kumaen ilo maror da inane wa.

⁷ Man dugo, ta san kankan in tinin o mi ilon isou dan man Anut o ager imado da. Agod kankan naok an sen yabi idup Anut san kubiaen paen na imado san man tia ya. Rumok, in ago igane san man ta idaisuda na ya.

⁸ Agod en sauta inſad bunud wagam ak lo dutor dan Anut ilo uyan dupani san ta idaisuda na ya.

⁹ Ak man Anut san Ur on tini ilon lo imado mok tap, onane bunu wagam ak ta ititiano na da, tia, Ur mi ititiano da. Agod talpein ta in Kristus san Ur aman tia tap, in Kristus san tia ya.

¹⁰ Ak gug, Kristus on lo imado tap, gidad aupasek lo on tini imat la bo man, on itaot lasa yan

lo oꝓane ur kumaen imado da.

¹¹ Agod enti iꝓ Jesus mutou lo ifufunig imasa yan san Ur oꝓ lo yen tap, iꝓsan Ur oꝓ lo imado dan lo oꝓ tini materꝓ san mi an dam iꝓ kumaen ipani wa.

Urgun iganeg id Anut nanun muroun tilasa ya

¹² Amaiak niꝓen o, ꝓai teig taog, rumok, id gubun* ad da ya. Gug id gubun an tukubune wo tap, id bunud wagam an san kagin ta tiri na wa.

¹³ Man dugo, oꝓ bunu wagam ak san kagin lo mado tap man, oꝓ umat a. Ak man Ur san dabai lo oꝓ bunu wagam ak san kagin funi imat tap, oꝓ kumaen mado wa.

¹⁴ Man ata wo, tamolpein ensauta Anut san Ur ititianai dan, iꝓ Anut nanun muroun mok a.

¹⁵ Ur e oꝓ ꝓane yen man oꝓ bigabeg igo lasa san ur tia ya. An lo oꝓ rurek ta ipano dop usuk umul na wa. Tia, oꝓ Anut nanun lasa san Ur ꝓane ya. Agod Ur oꝓ ilo iduduwi dugo igo ubol da, “O Bai, ꝓaineg Bai.”

¹⁶ Amaiak lo Anut san Ur iꝓsen mi idsad ur da ibateg, ru an awad kisaek lo id Anut nanun muroun tabol da.

¹⁷ Aria, id Anut nanun muroun tumado tap, filian tiꝓane san tamolpein tumado wa. Awo, id Kristus da madai tisini tap, id iꝓ da Anut san filian tiꝓane wa. Man dugo, id Kristus da madai tisini dan lo Anut mi id Kristus da girager ipanad a.

Anut nanun muroun iꝓanen girager murnai san diꝓane wa

* **8:12:** Pani

¹⁸ Naisag ilo sou lo, n̄ai girager a murnap Anut igane kuai te ilasa panad an, in̄ saen en san madai tisini dan da, n̄tumanai n̄kubianai tap, madai tisini dan mel kabelan igo won̄ a.

¹⁹ Man dugo, memel fidian Anut igane yan Anut in̄san nanun muroun kuai te idiraip dilasa dop dile wo malad diganeg diyep di dumado da.

²⁰ Anut memel fidian idirai an in̄sad turen̄ lo dal e nuñon tia yen mi duri wo ipidinai a. An man in̄sad ilobol san mel tia ya. Tia, Anut in̄sen ilon ibol ak igo ya, in̄sad turen̄ man nuñon tia yak ilasa wa. An lo ago igane ilasa ya. Ak gug kulob a igane yan mala nouk lo mi in̄ ago igane ya.

²¹ Ata wo, Anut san ilo girek lo, memel fidian igane yan digan o isubanaig dumado da. Ak gug saen isuda wan lo dop, in̄sen mi subanek an igane itout dop memel fidian an patun fo idiraip foun dilasa wa, agod in̄anen nanun muroun sad turen̄ girager aman da din̄ane wa.

²² Id talon̄ ak, saen gubak mi Anut memel fidian idirai man yaes isofutanaig madai amad da ya. Nek ibol pein nanuk igansi wo dop madai ile dak igo won̄ ipalug gamu da mi a.

²³ Gug memel fidian en mi tia ya, tia, id dam Awan Urgun san urat nuñon malan te ya. Id dam an lo madai tile dugo tumado da. An lo Anut in̄sen id in̄anen nanun muroun idirad tilasa wo mala nouk tumado da. Saen an lo dop Anut idsad tinid en ibilisap naon sen geig tilasa wa.

²⁴ Man dugo, Anut id patud ipasi san fun man, id mel a nin̄en o ilod yen dan mi lo ago tumado yau a. Id mel a nin̄en o ilod yen dan tile yak tap, ata wo mel an nin̄en o ilod isou dak i? Dugo, talpein ta mel

a ile la yan niñen o ka ilon yen ak i? Man tia geig a.

²⁵ Gug id mel a ta tile na dan niñen o ilod yen dop man, sed isatuanad pe, id mel an niñen o mala nouk tumado wa.

²⁶ Nek ago mi, id dabai amad tia yan niñen o, Awan Urgun ibinawad da. Id dugo woñ Anut o tugudani san ta talon uyan na ya, an lo id gudanek san dal tabiriñani da. Gug Awan Urgun inñen mi id bubed ilon lo mosiai dabai ak amad da yan waged lo Anut isumiani da.

²⁷ Enti inñ tamolpein bubedi lo abañ ile dan inñ Awan Urgun san ilo girek dam ilon a. Ata wo, Awan Urgun dam inñanen tamolpein gun ak niñedi wo Anut isumiani da, man dugo, inñ ago igane dan lo Anut san ilobol anua da.

Murnap id Anut Nanun igo tilasa wa

²⁸ Id talon ak, tamolpein ensauta a Anut niñen o dumat dan, ensauta a Anut yañad ipateg, igiaig inñsan ilo girek san dal duri wo dan niñedi wo gidad, mel dugo ilasa bo man, urat igane pidinai uyanan da.

²⁹ Id gamugo tilasa dugo Anut gubak mi id ilon go ipilianad a, an lo id bunud nek ibol inñsan Nanun san bunun igo mi tilasa wa. Ago dop an lo inñ tein muroun wei mi luluñad lo inñaned teid matu ak igo imado wa.

³⁰ Amaiak niñen o talpein ensauta a Anut ipilianai an yañad ipateg igiai da. An lo ensauta a yañad ipateg igiai an dam inñ itaot idirai da. An lo ensauta a itaot idirai an dam inñ inñanen bunun girager aman da yan ipidinai a.

³¹ Amaiak niñen o id mel an niñen o dugo tabol ak i? Anut id turad igo imado tap, enti id iliad saian ak i?

³² Anut iñanen Nanun ta ipirani na ya, tia, id fidian niñed o ibiseig imat a. An niñen o iñanen Nanun lo binawek kawan ak igo woñ melmel fidian dien dan id ipanad an rumok ak i?

³³ Enti Anut naon na itur pe, ensauta a Anut ipilianai an niñedi wo, iñsad muruan isini ipalup ibol ilasa wak i? Talpein ta ago igane san tia ya, man dugo, Anut iñsen mi ensauta iñanen an itaot idirai la ya.

³⁴ Enti imisilanad ak i? Jesus Kristus imat pasik a, iñ mutou lo imasag Anut tuon won ak ate itur go id niñed o igudani da. An lo id imisilanad ak i? Tia geig a!

³⁵ Enti Kristus iñanen ilo panek lo ibiatad ak i? Ata mel Kristus san ilo panek an lo ka ipasad ak i? Muruan boi, tia, ilo madai lo boi, kudi dak lo boi, kadag† lo boi, nuñon kawan imado dak lo boi, saian sumeik ipani dan lo agod sabiri lo boi i? Tia ya.

³⁶ Girek igo yen da,
 “Oñse niñe wo nal fidian dufunamag go mamat da.
 Man bilelek dufu dumat o dufutanai ak igo woñ diliama da.”

³⁷ Tia, iñsen lo iñanen ilon id ipanad a, an lo melmel en fidian lo id nek ibol enti yu lo isiñani ak san tamol igo woñ tilasag malan te agod malan te geig a.

³⁸ Amaiak niñen o ilog lo rumok a, mateñ tia, kumaed tumado dan tia, eñel adi tia, ur dabai amad

† 8:35: Futol

da yak tia, mel gamu ilasa den tia, mel murnap ilasa dan tia, ur saiadi ak tia,
³⁹ mel lak na yak tia, mel tan ilon lo geig ak tia, memel fidian a Anut idirai an luluᅇad lo mel ta dam tia, amaiak lo, Anut san ilo panek Jesus Kristus idsad Tubun ak lo, ipanad dan ibiatad san tia ya.

9

Anut kinj igo wonj sen ilon nam pilianek igane da

¹ Aria, Kristus malan lo ᅇai ru rumok ᅇabol da, ᅇai ta ᅇiraek na da. Agod Awan Urgun lo ᅇaineg kankan dam ᅇai ibalsiᅇanag go ᅇaloᅇ ak, ᅇai ru e ᅇurupaiaᅇ den rumok a.

²⁻³ ᅇai ilo muruan tubun mi ifunag da, agod madaᅇ tubun mi ilog lo yen dan itout san tia ya. Man dugo, ᅇai teig muroug Isrel adi, ᅇaisag dar kisaek an iᅇ Kristus patud dupani a, agod iᅇ Anut Kristus iganeg ipalu yan ilod lo ta rumok na ya. An niᅇen iᅇ niᅇedi wo Anut ᅇai Kristus siᅇire na yabi-anag pe daoᅇ ipanag a, ago dop an lo ibinawaip ilod lo rumok tap, Anut ᅇai lo ka ago igane wa. ᅇai ilog nek ago ibol da.

⁴ Iᅇ Isrel tamolpein, fun an niᅇen bar tutubun ak wei mi man iᅇsadi a. Iᅇ Anut iᅇsan nanuk ᅇilaᅇal igo iᅇal a, agod iᅇsan girager ipidinai a. Kontrak fidian an iᅇsadi a, agod Anut Moses kubiaeᅇ ipani an dam iᅇsadi a. Iᅇ Anut ubou an dile san dal duloᅇ ak, agod Anut san promis an fidian iᅇsadi a.

⁵ Iᅇsad dar igileg lo tamol yaᅇad tutubun ak dilasa ya, agod Kristus dam iᅇsad dar igileg ipalu yan lo ilasa ya. (An rumok, iᅇ tinin tan emaiak san

ninjen nabol da.) Ak man Kristus san mel taidam igo ya, inſen Anut. Ago yak ninjen o inſ mel fidian fufo na ya, an lo tamolpein inſ pempem yaſan lak na diabisa isuda yau da. Rumok.

⁶ Ak dugo, Anut inſ Abraham ru a irupei an nunjon ta ilasa na yak i? Tia ya, man dugo, Anut Isrel ninjedi wo ilo sou igane dan id tamol ilo sou tiganed ago tia ya. An fun igo ya, tamol ta inſ Isrel gugoi lo ipalu tap, an dugo, an inſ Anut malan lo Isrel tamol mok i? Tia ya.

⁷ Ago dugo tamolpein an igo dubol, “Maſ Abraham nanun muroun mok a,” dugo, an fidian Anut malan lo Abraham nanun muroun dumado di? Tia ya. Aloſ, Anut san buk lo ru igo tusuti da, Anut Abraham irupeig ibol, “Aisak nanun muroun amaiak tamolpein dil pe oſsa nanu murou ago dubol a.”

⁸ Anut ru mianuk a ibol irupei an fun igo ya. Anut nanun muroun mok man Abraham san dar lo ta dilasa na ya, tia, Anut san nanun muroun mok man, nanuk a ru promis inſ Abraham irupei an iri panim dilasa dak ama ya.

⁹ Man dugo, inſan nanun ninjen o Anut Abraham promis ipani man igo ya, “Anaſar naod na yan te dop nſai nſamul oſsa na nſupalu wa, ante gup Sara nanuk igansi wa.”

¹⁰ Agod an mi tia ya, tia, Esau inſ Jakob da sad am ipiterjanad ak Anut san pilianek mel tubun mok a, ak man tamol sad ilo girek man mel kawan ak oſ a. Aria, saen maſ tubuma Aisak iwon Rebeka da dien an Rebeka nanuk babagaru idirsi a.

¹¹⁻¹² Nanuk babagaru an dilasag inſaned kagin naok naok gamugo dile dugo Anut Rebeka iru-

peig ibol, “Nanuk matu ak san dar dilasa dan mitep nanuk bakan ak san dar dilasa dan paed na dumado wa.” Anut ago igane yan lo inanen ilo sou nuñon igane ilasa ya. An Anut sen pilianek igane ya, an tamol inşad naok naok lo tia ya. Man dugo, inşen mi tamolpein a inşan wagiñ duloñ an, amaiak ipilianai o ilon ibol a.

¹³ Fun an niñen Anut profet awan lo ago ibol, “Ñai Jakob ilog ipani do Esau man ñamoi geig a.”

¹⁴ Aria, id an niñen dugo ilod isou wak i? Dugo, Anut sen ilon nam tamolpein ipilianai dan igane saian di? Tia geig a.

¹⁵ Man dugo, Anut Moses igo irupeig ibol, “Ñai seg ilog nam talpein ilog ñupani wak, agod ñai seg ilog nam talpein ilog imunani wa.”

¹⁶ An niñen gamu id mel en lo na Anut san dal talon a. Ak talpein ta ilon ago ibol, “Ñai seg ipilianag ak Anut inşiliag pe inanen urat ñigane wa.” Anut inş pilianek ago ta igane na da. Tia, talpein ta ilon ibol, “Ñai Anut san a, man dugo, ñai urat wagai ñigane da.” Inş dam Anut ta ipiliani na ya. Ak man Anut inş talpein ipiliani da, an inşinan ilo muñanek lo mi ago igane da.

¹⁷ Agod Anut inşen ilon ibol ak fom tamol ipitiñinai an ipilianai da. An id talon a, man dugo, Anut ru girek lo na Igipta sad kiñ Farou niñen igo ibol, “On bube sakar go silei gane an niñen ñai onş ñipilianog kiñ lasa ya. Ñai ago ñiginio yan lo onş ñaisag ager mado wa. An san fun igo ya, ñai onş muruan ñupano dop lo tamolpein malad ipalup ñaisag tuog dabai tubun an dile wa. Ago dop ñaisag yanşag an

tamolpein e sumeik dumado den, agod a asau mi dumado dan diñiñeñ ila isop yau a.”

¹⁸ An niñen o id taloñ ak, Anut inñsen ilon nam tamolpein aenta inñsan ilo muñanek ikubiai dile wak, agod tamolpein aenta bube sakar ipidinai dop silei digane da.

¹⁹ Gug oñ dap igo rupaiag ak boi, “Enti Anut inñsen ilon ibol ak iri panim mel dugon igane wo dan yabiani san idaisuda yak i? Ago tap, ata wo inñ ru lo id isiad di?”

²⁰ Aria, ñaisag ru naon igo ñurupaio. Oñ enti, oñ Anut ru naon ka rupei ak i? Oñ man Anut sen iginio ya. Dugo, oñ Anut riñanig lak na yak niñen o ka igo ubol, “Oi, oñ ata wo ñai tamol naok igo yak giniag ak i?” Oñ ru ago ka ubol rupei ak i?

²¹ Uloñ uyan, saen talpein ta katik* lo bod urat igane tap, inñsinanen mañau lo mi mel idiri ilasa da. Katik malan kisaek itumani an lo, bod sensen idiri wa. Bod kisaek san leil lo man girager uyanan mok a. Ago dugo bod neinta man nek ibol bod gidad oñ a. An niñen dugo, bod an imasap ibol, “Oi, oñ ago giniag umoi,” ago ka ibol ak i?

²² Saen tamol bod idiri dop, aenta a saiadi man imoip yabi yau a. Ago dop aenta uyadi an mi kagin ipidinai a. Ilo sou an man mitilaen Anut Isrel tamolpein lo ago igane da. Saen milaen mok Anut Isrel tamolpein ilod ibileksa wo malan igane ya, ak man inñsan ilo muñanek san nuñon tia ya. An niñen o gamu inñ ipitiñinai o ilo sou igane da. Inñ Isrel tamolpein niñedi wo tiñae saian an tamolpein aenta ikubiai dile wak, agop inñsan tuon dabai an kuai tem ikubiai dile wa.

* **9:21:** Foi

23-24 Ak man bod aenta in Anut san ilo munanek an dukubiani wak, agod in mel uyanan Anut ipidinai an dulong uyan a. Bod naok an man id tamolpein a Anut sen igiad ama ya, agod wagam mi inanen girager uyanan amaiak tinane wo ipilianad a. Aenta Juda dugo aenta Juda tia ya.

25 Nek ibol Anut profet Hosea san ru girek lo na ago ibol,

“Tamolpein a gubak mi ‘naisag tia yak’ nabol na yan, gamu ‘naisag tamolpein’ ago nurupidai a,

agod tamolpein gubak mi ninedi wo ta namat na yan, gamu ‘an tamolpein ninemi wo namat dak’ ago nurupidai a.”

26 Agod fon ru girek lo,

“Anut tamolpein ta igo irupidai ‘an naisag tamolpein tia ya,’

ago gug aben kisaek nek atna mi fon irupidai ‘an Anut kumaen imado damaiak nanun muroun a’ in awan ago dulong a.

Mitep mel an ago ilasa wa.”

27 Ak man profet Aisaia Isrel tamolpein ninedi wo iwagin go ibol,

“Gidad Isrel tamolpein igilep lon na lul igo wei mi wak,

gug man Anut san pitininek saen lo wei an tia dumado yan mi patud ipasi wa.

28 Man dugo, Tubun en insen ibol ago igane wa, in tan en san tamolpein fidian ipitininai a, agod in ririan, itaot mi atem ago igane wa.”

29 Agod Aisaia fon saen murna ipalu dan ninen o igo ibol,

“Isop Tubun en did panu san yu gurman nanuk tata ibisawaip ta dumado na yak man, id fidian taun Sodom inj Gomora da sad tamolpein igo mi wa.”

Isrel adi kubiaen lo itaot dilasa man tia ya

³⁰ Aria, an ninen dugo ilod isou wak i? Id talon ak gob adi inj gidad Anut malan lo ikok dumado wo urat ta digane na ya, ago bo man inj dal an dile ya. Man dugo, inj ilod lo rumok an ninen o Anut inj itaot iginiai a.

³¹ Ak man Isrel tamolpein kubiaen diganuri wo urat wagai mok digane na ya. Man dugo, inj ilod lo dal uyan man kubiaen lo mi yen dak ago dubol a. Inj urat wagai digane bo man inj itaot ta dilasa na ya.

³² An ata wo ago i? Fun man inj Anut malan lo itaot dilasa san dal an ilo rumok san dal tia yak dubol. Tia, inj ilod lo urat wagai kubiaen diganuri dan lo, Anut injiliaip itaot dumado wak ago dubol. An ninen o pat ta insad dal te yen an njied isueg diau dudu ya.

³³ Aisaia san girek igo yen da,
 “Ale, naj Saion lo pat njied isuep, diau dudu san njigansi wa.
 Ak man talpein enti pat en ilon lo rumok dop man miai ta ifuni na wa.”

10

Isrel adi Anut san kagin ninen o ta dulon uyan na ya

¹ O naj teig taog, rumok njabol da, naj Anut Juda adi daon ipidinai o man njamoi geig da. Agod saen

ņai Anut san na ņugudani dan iņ patud ipasi wo ņusumiani da.

² Ȋai iņsad kagin ņile uyan a, an lo iņ niņedi wo kuai te ago ņabol ilasa da, iņ Anut niņen o man urat wagai digane na ya. Ak man melmel a digane yau dan, iņ ata mel Anut ilon ibol dan ago mi ta digane na da. Man dugo, iņsad dulonį anen man katuk aman a.

³ Iņ Anut san buben itaot ak id ilod lo igane yan ta dulonį na ya. Iņsiganed dulonį san mi duri wo ilod yen da, amaiak lo iņsed mi itaot dilasa wo dabai digane se ya. Ago gug iņ Anut san buben itaot ak ipidinai o dumoi na ya.

⁴ Moses san kubiaenį fidian san wadan futanek man Kristus mi a, an iņ ta dulonį na ya. Man dugo, talpein enti Anut o ilon lo rumok, an mi iņ Anut malan lo itaot ilasa wa.

⁵ Kubiaenį a tamol ilon lo kagin itaot ak igane ilasa dan niņen o Moses ago ibol, “Talpein kubiaenį an iri dop iņ kumaen imado wa.”

⁶ Gug ilo rumok a kagin itaot id ilod lo igane ilasa dan niņen o girek ago ibol, “Oņ bube lo igo ta ubol na wa. Enti did panu lo yau ak i?” (an lo iņ Kristus tan na igane idu wa),

⁷ “tia, enti gib fun tia yak lo idu wak i?” (an lo tamolpein dumat ak sad na Kristus iņanep kuai te sisem dilasa wa).

⁸ Gug girek an dugo ibol i? “Ru en oņ siņire na yen da, nek oņ awa lo, bube lo dam mi a.” Ru nek an oņ ilo lo rumok san amaiak mi maņ mufulale da.

⁹ Ru en igo ya. Jesus iņ Tubun a, isop oņse malak malak lo ago ubol ilasa dop, Anut Jesus mateņ lo

ifufunig fon imasa yan ilo lo rumok tap, oŋ patu ipasi wa.

¹⁰ Man dugo, oŋ bube lo in ninen o ilo lo rumok, ago dop Anut malan lo oŋ tamol itaot ago iginio wa. Agod oŋ awa lo Jesus in Tubun ak malak malak ubol ilasa wa, an lo in oŋ patu ipasi a.

¹¹ Ru girek ago ibol, “Ta in ninen o ilon lo rumok dop miai ta dupani na wa.”

¹² Juda adi Juda tia yak da lulunad lo biatitek tia ya. Tubun ak kisaek mi in fidian sad Tubun a. An fidian mi in duwagin dan bar uyan ak wei mi ipidinai dan itout san tia ya.

¹³ Man dugo, ru girek ago ibol, “Enti Tamol Tubun ak yanjan lo igudani dan, Anut patun ipasi wa.”

¹⁴ Ago man, tamolpein a Tamol Tubun ak ta dulon na dugo in o ilod ta rumok na yan, en dugo won pe in lo gudanek ka digane wak i? Ago man, Tamol a ninen o ru ta dulon na yan, en dugo won pe in o ka ilod rumok ak i? Ago man, talpein ta ipalug Kristus ninen o ta irupidai na yak ago tap, en dugo won pe in Kristus ninen o ru dulon ak i?

¹⁵ Agod taida mi, talpein ta, aenta ta didinaig diau na yak ago tap, en dugo won pe tamolpein an naod na Kristus san ru dufufale pidinai ak i? Nek ibol ru e digire en ibol ago, “Tamolpein a bilalun uyan ak disini dupalu dan, inaned njiedi turen diabi dan sinjakaan mok a.”

Isrel adi wei mi bilalun uyan ak dulon o dumoi a

¹⁶ Gug Isrel aenta Kristus san bilalun uyan an ta duri dupani na ya. Aisaia ago ibol, “O Tubun en, enti ru e murupeig ilon en ilon lo rumok ak i?”

17 An lo ilo rumok man, Anut san ru a talon amaiak lo ilasa da. Agod ru a talon dan tamolpein Kristus ninen o dubol dan awad lo ilasa da.

18 Gug naj ago nabol a. Dugog in ta dulon na i? Man tia ya. Ru e girek lo yen,

“Inaned ru dubol dan, aben fidian lo yau a.

Inaned ru an tan yaug titin itout ak lo ilasa ya.”

19 Nai afon ago nsumiana, dugo, Isrel tamolpein ta dulon uyan na i? Man tia ya. Man dugo, malan malan Moses Anut san awak aban igo ibol,

“Nai an njidira pe tamolpein a dar ta kisaek nag tan gidigidad lo dumado dan eil saiadi dop ninedi wo turak asusa wa.

Nai warou kisaek san tamolpein kankan tia yak ninedi wo an tin ae saiak nupana a.”

20 Agog tinin te Aisaia igo ibol san ninen o ta irer na ya,

“Tamolpein a naj abanag ta diabi na yak man diliag a.

A naj nineg o ta dusumiaen na yan naod na naiseg kuai te ibilag nilasa ya.”

21 Ak man in Isrel tamolpein ninedi wo ago ibol,

“Nai nal fidian nmasa natur go banig nuwateg in nyuyunanai wo malag nigane da.

Gug tamolpein an silei tinadi a, naj awag ta diabi na ya. Ad milaen natur dugo, ru kagin a nurupidai se yan ninen o pirginek ru dupanag na ya.”

11

Isrel adi luluḡad lo warou kitekan mi inḡsan binawek diḡane ya

¹ Aria, en dugo, Anut inanen tamolpein yabianai geig di? Tia ya. Nai dam Isrel tamol a, ak man in nai ta yabianag na ya. Nai Abraham san dar lo nilasa ya, agod nai Benjamin san gugoi lo numado da.

² Anut inanen tamolpein in gamugo dilasa dugo ipilianai la yan yabianai san tia ya. Ru girek e Elaija ninen o ibol den ta alon na yak i? In Anut Isrel yabianai san ninedi wo dugo won imosiai dan an ta alon na yak i?

³ “O Tubun en, onane profet adi dufu dumat a, onane alta fidian durube idu ya. Gamu naiseg mi numado da, ago yan lo nai dam dufunag namat o digane dugo dutor da.”

⁴ Ak man Anut ru naon dugo won irupeig ibol ak i? “Tamol seven tausen dumado da, in tubud sewak a Baal dubol dan naon na ditakoksi man tia ya. Tamol an nai najan go naineg ak dumado da.”

⁵ Gamu nek ago mi gugoi wadan tusan a Anut in san ilo munanek lo ipilianai an gamu dumado da.

⁶ Anut inanen ilo munanek lo san pilianek igane ilasag yen da, kubiaen turi tupani san urat lo igane ilasa man tia ya. Gug an tia tap, in san ilo munanek an nunon tia wa.

⁷ An ninen dugo? Isrel tamolpein mel a wagai diganeg dile yan ta dinane na ya. Gug tamolpein a Anut ipilianai an mi mel an dinane ya. Gug wadan a dumado yan fidian inaned bubed pat igo sakar kasik ilasa ya.

⁸ Nek ago mi ru girek lo ibol,

“Anut in dinan san ur ipidinai a.

In malad ipidinai bo man mel ta dile san tia ya.

Inj kududod ipidinai bo man duloŋ san an dam tia ya.

Inj ago digane ipalug gamu dam nek ago mi digane da.”

⁹ Agod Dawid ibol,

“O Anut, oŋ inj niŋedi wo igo gane wa.

Injsad kubiaen san soubul an ibol dob igo woŋ, agod ibol suwanok igo woŋ oŋ gane ilasa wa.

An nek ibol mel ta ŋied isubanip diau dudu san igo woŋ gane ilasa,

agod nek ibol naon muruan tubun ak dile igo woŋ, ago gane wa.

¹⁰ Malad tidom tubun yafutanip inj aban ta dile na wa.

Saen fidian inj uyud tuon iluwi dop dutor a.

Oŋ muruan naok an ago pidinai a.”

Anut Juda tia yak injal imul a

¹¹ Dugo, inj ŋied dusueg diau dudu yan fon du-masa san tia i? Man tia geig a. Tia, inj aupasek digane yan lo Anut gob adi patud ipasi san dal igane ilasa ya. Anut gob adi lo ago igane yan Isrel tamolpein tiŋae fufaik ipidinai a.

¹² Amaiak niŋen o, injsad aupasek an man tan en san tamolpein sad filian, agod injsad kagin naok an man gob adi sad bar uyanan a. An ago tap, en dugo, saen inj Anut san ar lo diladu san an man uyanan geig a.

¹³ Aria, gamu ŋai an tamolpein Juda tia yan ŋurupaian da. Anut ŋai aposel ipilianag a, agog idinag go an gob adi sam na ŋupalu ya. An niŋen o saen ŋai ru ŋufulale dan, ŋaisag urat san nuŋon ilasa yan niŋen o ŋabol ilasa ya.

14 Njai ago n̄igane dop lo n̄aisag dar kisaek san tamolpein adi tin̄ae fufaik digane wa. Dal an lo dop nap aenta patud n̄upasi wa.

15 Juda adi, Anut yabianai ak san nuñon man Anut tan en san tamolpein sad turad ilasa ya. An ago tap, saen Anut Juda adi niñedi wo ilon ipidinai da wa, en dugo? An san fun igo ya, tamolpein mateñ lo fon dumasap kumaen dutor a.

16 Aria, anañ malan malan an gun dop man anañ wadan yen dan fidian gun a. Nek ago mi, ai dabin an gun dop man, ai raen an fidian dam gun a.

17 Ai a panu san an man ru mitilaen Isrel tamolpein lo yau a, ago dugo oliv ai garan san an man añ tamolpein Isrel tia amaiak san ru mitilaen igo ya. Anut igo igane ya. In̄ ai oliv panu san an raed aenta ituteg yabi yau a. Ago dugo yaug garan san ai oliv didilad ituteg in̄ane ipalug oliv panu san raed itute yau amaiak abed lo ibate idu ya. Agog an lo ai panu san an san toub bulbal uyan ak ai garan san raed an diñane dugo disa uyanan a.

18 Ak man añ tamolpein Juda tia yan Anut ai raen a itute yau an niñen o sem yanam ta abisa na wa. An̄ ai raen añsem niñemi wo ru tutubun mi abol tap en ilom isou. An̄ ai dabin ta asini na da, tia, ai dabin an añ isinañ da.

19 Ago man oñ ta n̄ai igo rupaiag, “Anut ai raen aenta itute diau dop n̄ai abed na isatuanag a.”

20 Awo, an rumok a. Gug in̄ ilod lo ta rumok na yan niñen o ai raen an isalsuni a. Agod añ ilom lo rumok an lo mi dabai am da atur da. Fun an niñen o añ sesunoi kagin ta agane na wa, tia, Anut niñen o arer dop amado wa.

²¹ Man dugo, Anut in̄ ai oliv panu san an raen isalsuni san ta geg igane na tap, nek ago mi an̄ garañ san ai raen in̄ o ilom lo ta rumok na dop man, in̄ an̄ dam isalsunañ a.

²² Amaiak lo an̄ Anut san ilo muñanek, ilo wananan da ilom isou. Tamolpein a diau dudu yan Anut san ilo wananan dukubiani a, ak man an̄ man in̄san ilo panek an mi akubiani wa. An̄ in̄san ilo muñanek san dal mi ari au a, ago ta agane na tap, an̄ dam ago itartitañ pe ibiañ au a.

²³ Agod aenta ilod lo ta rumok na yak san dal lo pempem dumado san tia tap, in̄ fon in̄al pe in̄sinan raen fo isatuanai da wa. Man dugo, Anut fon ai raen an abek nam isatuanai san idaisida ya.

²⁴ Ale. Ai oliv garañ san an raen in̄anep, ai oliv panu san raen aben na pasauman igane san man tia ya, ago bo man an da ka isatuani a. Mago tap, Anut pasauman mok in̄ ai oliv panu san raed an in̄sed abed nam isatuanai da wo igane wa.

Saen ipalu dan ate Anut Isrel adi fidian patud ipasi wa

²⁵ O teig taog, ñai ilog igo ya, an̄ Anut anen ilo girek mianuk yen en ninen añaon̄ san tia ya, kabelan an̄sem yañam asini banau. Aenta Isrel luluñad lo bubedi sakar ilasa ya. Ago mi dumado yaup murna gup gob adi a Anut ipilianai an fidian in̄san ar lo diladu wa.

²⁶ Ago dop nal an lo Anut Isrel adi fidian patud ipasi wa. Ru girek lo en igo ya,
 “Patun pasek tamol panu tubun ak Saion lo ilasa wa.

Inj Anut patud dupani san kagin Jakob san dar ilod lo yen dan ipasi yau a.

²⁷ Saen an lo ηai inşad aupasek ηususas yau dop kontrak an ηupidinai a.”

²⁸ Anut inj Juda tamolpein niηedi wo dal uraru en ilon isou da. Ru uyanan e mufulale den niηen o, inj Anut o ager dumado da, ago mi inj niηedi wo ilon isou da. Agod an lo inşan bar uyanan anşam na ipalu ya. Gug Anut talpein ipilianai ak niηen o, inj Juda adi ilon ipidinai da, ago mi inj niηedi wo dam ilon isou da. Man ata wo? Inj wagam mi mok tamadi niηedi wo imat a.

²⁹ Man dugo, Anut san wagin agod inşan lou kawan ipanad an ipasi san tia ya.

³⁰ Wagam an Anut awan aparsisali na ya, ago gug Juda adi sad awa parsisalek an nuηon gamu Anut injanen ilo muηanek an ipanaj da.

³¹ Nek ago mi Juda adi dam awa parsisalek dumado dan ilasa ya. Agod gamu an Anut san ilo muηanek anane yan niηen o inj dam inşan ilo muηanek diηane wa.

³² Man dugo, Anut inj tamolpein fidian awa parsisalek kagin paen na dumado yan ago igane ilasa ya, ago dop an lo inj tamolpein fidian ilo muηanek ka ipidinai a.

Pol Anut yanjan yabisa da

³³ O rumok nuηon, Anut san filian, maηau, ilo safulalek an tubun geig a.

Injanen bitinaek id abanjan tilep talon san tia ya.

Agod inşan kagin naok naok id tile talon san ta idaisuda na ya.

- 34 “Enti Anut san ilo girek igane dan ilonj i?
Enti inj manau ka ipiterjani wak i?”
- 35 “Dugo, enti imug mi mel ta Anut ipanip, an lo
Anut inſan gubun* an ka ikubune wak i?”
- 36 Man dugo, inſan na dupalu dan, inj tuon lo, inſen
niſen o dam mi mel en fidian dilasag dien
da.
Inj saen pempem mi girager aman da imado
wa.
Rumok.

12

Oſ Anut urat ipano wo tap banin lo se iginio wau

¹ Fun an niſen o ſai teig taog, Anut anen
ilo muſanek tubun an niſen o ſai igo ſurupaian
da. Ananem tinim kumaem anda yak ananep, lou
panek igo wonj, Anut inſan urat ipanaj san niſen
banin lo sem idiranj a. Inj malan lo kagin naok an
gun a, agod kagin an inj uyan ipani da. Man ata
wo? Kagin nek an, an inanen biabi nilanjal agane
wo ago ilon yen da. Anj ago agane tap, inſan ubou
leil mok agane da.

² Agod an tan en san tamolpein sad ilo sou man
ta atutanjani na wa. Tia, ilom bubem awan apasip,
Anut an ilom ibilisa dop ananem ilo sou foun ak ka
ilasa wa. Amaiak niſen o Anut dugo ilon ibol dan
anj alonj uyanan a. Anut san ilobol an mel uyanan
a, an dam itaot geig, agod inſan ilobol an anj ilo
uyan ipanaj da.

³ Aria, Anut san ilo muſanek ipanag an lo ſai anj
fidian kisaek kisaek niſemi wo igo ſabol. Onſe mel
aenta uyan ak gane amaiak niſen o se ta ibiosa

* 11:35: Pani

na wa. Tia, oꝛane nouk nouk niꝛen o ilo isou uyanan a. Man dugo, Anut ilo rumok an yabitig id ilo rumok adi anek anek iwae ipanad a, aenta tubun mi ipidinai a, aenta tubun an tia ipidinai a. Amaiak niꝛen o oꝛse mi bitinaek lo gane wa, kabelan oꝛ kawan se ibiosa banau.

⁴ Aloꝛ uyan. Idsad tinid kisaek gug, ilon lo man tinid boi wei mi dien da. Tinid boi an iꝛsad urat kisaek tia ya. Tia, iꝛsad urat naon sensen dien da.

⁵ Nek ago mi, id ilo rumok adi man wei mi bo man Kristus tinin lo tutumanig tinik kisaek tilasa ya. Agod id kisaek kisaek idsad tinid man aenta sad tinid san boi tumado da.

⁶ Anut iꝛsan ilo muꝛanek naon sensen ipanad a, amaiak niꝛen o bar uyanan ak urat tigane san dam sensen ipanad da. Talpein aenta profet urat san dabai diꝛane ya, amaiak lo Anut ilo rumok ipidinai ak diri dan lo, iꝛsan ru dubol ilasa wa.

⁷ Tamolpein aenta binawek uyanan digane san dabai diꝛane ya. An niꝛen o tamolpein aenta dubinawai mok a. Aenta girek maꝛau urat digane wo igiai a. An lo man iꝛ girek maꝛau urat mi digane wa.

⁸ Ta iꝛ ru kagin ibol ilasa san urat ipani tap, iꝛ nek ago mi igane wa. Ta iꝛ tamolpein aenta ibalsiꝛanai san dabai iꝛane tap, ilon kisaek mi urat an igane wa. Ta iꝛ urat ititiani san tap, maeg igane wa. Ta iꝛ ilo muꝛanek san iꝛane tap, iꝛ ilo uyan lo ago igane wa.

Anꝛ Kris adi anꝛanem tureꝛ kagin apani

⁹ Aria, oꝛ tamolpein aenta binawaip ilo pidinai ak tap, nek ago mi ilo pidinai mok a. Kagin saiak

saiak patu pani dop, kagin uyan ak mi gane wa.

¹⁰ Ansem nug teim taom igo wonj nug ninjen amat a. Ansem nugnug lo teim taom yanad asini san kagin ninjen o onj maeg ganep tei rinjani wa.

¹¹ Urat lo dabai gane, yalis umoi. Onjane ilo lo Awan Urgun awan isag mado da, an lo onj tini fidian ilalanj anda yak ided onj da. Tubun en san urat gane wo ilo pani wa.

¹² Onjane mala nouk mado dan lo utur dop you isa wa. Muruan lo dop utur sakar a. Pempem Anut gudani dop mado wa.

¹³ Onj tei tao aenta ilod lo rumok ak inj mel ta o dumat tap, onj aenta dida melmel lo ibinawai san atumanip apidinai a. Onj talpein asau mi ipalu yak kagin pani uyan san dal mi urip, kaginan gane wa.

¹⁴ Saen tamolpein dufunop muruan dupano wo dukudo tap, onj Anut naon muruan ipidinai o ta sumiani na wa, tia, inj bar uyan ak ipidinai o mi sumiani wa.

¹⁵ Tamolpein ilod uyan tap, onj dam inj dadi sisem yousai agane wa. Agod tamolpein ilod saian pe tinañ digane tap, onj dam dadi sisem tinañ gane wa.

¹⁶ Anj nugnug lo ilom kisaek mi amado wa. Ansem yanam lak na abisa amoi. Tia, anj tamol kawan, yanad tia yak dam turad mok amado wa. Ansem manau tutubu amam da yak ta abol na wa.

¹⁷ Talpein muruan ipano tap, naon muruan pani umoi. Tia, onj tamolpein sad leil lo kagin a uyanan mok ilo isou dan mi gane wa.

¹⁸ Dal yen tap, onj tamolpein fidian dadi ilo maror lo mi amado wa. Inj onj o ager dumado yau tap, gidad mel an inj sad mi a.

¹⁹ Turag muroug, saen tamolpein dibianj adu tap, anj pani naon afuli wo ago ta agane na wa. Tia, Anut anen tinjæ saiak an mi aben apani dop injen mi pani an naon ka ifuli wa. Man dugo, ru girek lo ago ibol, “Tubun ak igo ibol, talpein enti igane saian ak naon panek man, njai mi a, njaiseg mi injan panu an naon njufuli wa.”

²⁰ Ak gug,
 “Onsa ager an imatigen tap, ananj panip yani wa.
 Inj you o imat tap, you panip iluk a.
 Kagin amaiak lo man nek ibol onj yai midiger gumuran fo kulmaek igo wonj gane da.”*

²¹ Kagin saian an onj ta ibio sakar na wa, tia, kagin uyan ak lo kagin saian an san dabai wabi idu wa.

13

Anj gabman gurman fidian paed na amado wa

¹ Anj fidian anjanem gabman san gurman anj ditirnanj dan awad paen na amado wa. Man dugo, Anut mi inj titianek tamolpein fidian idirai san fun mok a, agod gurman a id ditirnad dan man Anut sen ipilianai a.

² Amaiak lo, talpein inj titianek tamol awad iparsisali tap, inj tamolpein a Anut ipilianai an awad iparsisali da. Agod tamolpein fidian kagin a duri dan Anut injsad muruan an naon ipidinai a.

³ Gurman adi inj tamolpein kagin uyan ak mi digane dan rurek ta dupidinai na wa. Tia, tamolpein a kagin saian ak digane dan mi rurek dupidinai a. Onj tan gurman ninjen o urer umoi ak i? Ago tap,

* **12:20:** Dal an lo onj injanen tinjæ saiak wabi idug, ilon ibileksa dan panu da.

kagin uyan ak mi gane dop, an lo tan gurman an oŋ ilio uyan a.

⁴ Man dugo, iŋ man Anut san urat pinein, oŋ mado uyan san kagin ipano da. Ak man oŋ kagin saian ak gane tap, urut dop urer saian geig a. Kabelan iŋ sabiri kawan yabi dak ago ilo isou banau. Iŋ Anut san urat pinein, amaiak tuon lo talpein ta kagin saian ak igane dan, Anut san tiŋae saiak ile wa.

⁵ Fun an niŋen o, oŋane gurman adi awad paen na mado wa. Dal an lo Anut tiŋaen saian san kagin riŋani wa. Fun an niŋen o mi tia, tia, oŋane kankan uyan ak a ru kagin ipano dan niŋen o awa parsisalek ta gane na wa.

⁶ Nek fun an lo aŋ gabman san takis dam abal a. Man dugo, gabman san urat pinein adi man dam Anut san urat pinein mi a, agod iŋ pempem tamolpein sad madok uyan dumado san kagin digane da.

⁷ Amaiak niŋen o aŋ aŋanem gubun* naok ago yak fidian akubune wa. Saen gabman takis abal o ibol tap, ago agane wa. Takis naon sen ak abal o dubol tap, an dam abal a. Tamolpein awad ari apani wo dubol tap, aŋ nek ago agane wa. Tamolpein dititianaŋ dan yaŋad asini wo dubol tap, an dam nek ago mi agane wa.

Kristus san nal sumeik an niŋen o aenta niŋedi wo amat a

⁸ Oŋ talpein ta san gubun tini lo ta yen na wa, tia, nug niŋen o amat san gubun mi tini lo yen a. Man dugo, talpein ta iŋ turan ilon ipani dan, kagin an lo kubiaen an fidian ituanai idu da.

* 13:7: Pani

⁹ Moses kubiaenḡ igo ibol, “Onḡ jeit ta gane na wak, onḡ tamol ta funip imat na wak, onḡ aenta sad memmel ta ugam na wak, onḡ tamolpein aenta sad memmel niḡen o mala ta isi na wa,” agod kubiaenḡ aenta dam ru girek en lo yen da. Gug kubiaenḡ kisaek en kubiaenḡ an fidian ituanai idu ya, nek “Onḡ se ilo ipano dak ago mi tura ilo pani wa.”

¹⁰ Talpein ta inḡ tamol ta ilon ipani dan, inḡ lo kagin saian ak ta igane na da. Amaiak niḡen o ilo panek san nuḡon man nek ibol kubiaenḡ an fidian iganuri dak igo woḡ a.

¹¹ Agod taida mi anḡ en alonḡ ak, saen iparsikawad ak niḡen o ḡionḡ abiseip amasa wa. Man dugo, gamu en patud ipasi san id sumeik ipanad la ya.

¹² Tidom tubun ibisawad dugo ilalanḡ sumeik ipanad a. Id tidom san kagin ta tigane na wa. An niḡen o lilaman san yu mi tuburoup tawanḡ tigane wa.

¹³ Anḡ ad aman ator dak ago turenḡ uyanan ator a. Ayu aluk pe abanḡ daonḡ ta agane na wa. Jeit lo, memmel saian ak lo bubem imasa san lo, wagai lo dabai agane san lo mi tia.

¹⁴ Tia, anḡ Jesus Kristus anḡanep kulos igo agane wa. Agod mel ta aganep anḡsinam tinim san ilobol afutip idaisuda wo ago ta agane na wa.

14

Onḡane tei san ilo rumok dabai tia yan ta pitinḡini na wa

¹ Aria, saen talpein ta san ilo rumok dabai tia yan anḡsam tumanek lo ipalu tap, anḡ ilo uyan lo mi anḡane. Ak man anḡ inḡsinan ilo sou an niḡen inḡ da nug apei wo agane man amoi a.

² Nai ago nabol dan fun igo ya. Ilo rumok adi aenta mel an uyan dubol da, ago dugo aenta mel an saian dubol da. Talpein ta in ilon lo anaŋ nuaeŋ mudan nuaeŋ an mel uyan ak ago ibol da. Ago dugo talpein san ilo rumok dabai tia yan, in Juda sad kubiaeŋ ilon isou dan lo mudan yani san lo muruan ifuni da. Fun an niŋen in pinapaŋ mi yani wak ago ilon isou da.

³ Talpein a mel mudan yani dan in talpein mel mudan ta yani na dan niŋen o ta imisilani na wa. Nek ago mi talpein a mel mudan ta yani na dan in talpein mel mudan yani dan ta ile saian na wa. Man dugo, Anut talpein an inane la ya.

⁴ On enti, go on talpein sen ak san urat pinein wabi idu wo gane di? Insen mi inanen tubun ak naon na itur boi, tia, yau idu boi. Gug en rumok geig a, in man itur mok a. Man dugo, inanen tamol tubun ak lo itur san dabai idaisida ya.

⁵ Aria, talpein ta in nal aenta gun mok ak ago ilon isou da, ago yan lo in Juda sad nal gun an sad kubiaeŋ iganuri san kagin ipani da. Gug talpein sen ak in nal an fidian naon kisaek ak ago ilon isou da. Tamol an in sed anen anen atem kagin ago digane dan dibitinaep dile wa.

⁶ Talpein ta in nal gun an san kubiaeŋ iganuri dan, in Tubun ak yaŋan yabisa wo ago igane da. Nek ago mi talpein a mudan fidian ka yani wo ibol dan, in dam Tubun ak yaŋan yabisa wo ago igane da. Man dugo, in mudan a yani dan niŋen o Anut ilo uyan ru irupei da. Ago dugo talpein a mudan imoi dan, in dam Tubun ak yaŋan yabisa wo ilon isou da. Agod in dam Anut ilo uyan ru irupei da.

⁷ Talpein ta in sen kisaek imado san tia ya. Agod

injen kisaek imat san tia ya.

⁸ Tia, id kumaen tumado tap, Anut o kumaen tumado wa. Agod id tamat tap, Anut o dam tamat a. Amaiak ninjen o, id kumaen tumado boi, tia tamat boi, id Anut san mi a.

⁹ Fun nek amaiak ninjen Kristus imat go fon kumaen imasa da ya. Inj ago igane yan lo inj tamolpein dumat ak, agod tamolpein kumaen dumado dak dam sad Tubun ak imado da.

¹⁰ Onj ata wo onjane tei bitinaek lo gane dak i? Agod fon, onj ata wo onjane tei misilani dak i? Alonj uyan, id fidian Anut anen bitinaek san kalik naon na tatur a.

¹¹ Man dugo, ru igo yen da,
 “Nai kumaeg numado dan rumok tap, naisag ru en nujon ilasa wa.

Tubun en igo ibol da. Tamolpein fidian naj naog na ditakoksi wa.

Agod tamolpein an fidian Anut naon na inaned muruan dubol ilasa wa.”

¹² An lo id anek anek mel dugo tigane na yan fidian Anut naon na walal te tidiri ilasa wa.

Onjane kagin lo tei Kris ak aupasek lo yau idu wo ta gane na wa

¹³ An ninjen id fon nug ta tibitinae na wa. Tia, id igo ilod isou wa, tuparsisi san mel ta teid san dal te ta tigane na wa, agod suwanok dam teid san dal te ta tigane na wa.

¹⁴ Rumok ak, Anut malan lo ananj mudan an fidian ikok mok a. An naj njalonj uyan a, agod naj Jesus Kristus lo numado da, an lo inj naj ateg isueg naisag ilo sou an itaot a. Ak man talpein ananj ta boi, mudan ta boi inj yani san an ta ikok na yak ago

ilon isou tap, aria in ninjen o mi mel an ta mok ikok na ya.

¹⁵ On onjane tei mel ta wani dan ninjen o ilon muruan tap, an ninjen o onj ilo panek san dal uri san tia ya. Mel a ta wani na wan umoi tap, an uyanan a. Kabelan tamol a in ninjen o Kristus imat an, onj mel dugo wani dan lo, onj tamol an daonj pani banau.

¹⁶ Onj mel uyan ak ta wo ilo lo rumok a, gug tamolpein aenta mel an ninjen o ru saiak dubol tap, an lo onj ilo sou saian ak gane ilasa man umoi a.

¹⁷ Man dugo, saen Anut in sen mi idsad Tubun ak imado man, tani taluk san ninjen o mi tia ya. Tia, id Urgun lo kagin itaot, ilo maror, uyasusai amad da tator a. Kagin nek an mi malan te ya.

¹⁸ Fun an ninjen tamol enti kagin naok an lo Kristus san urat igane dan Anut ilo uyan ipani a. Agod tamolpein sad leil lo tamol an uyanan a.

¹⁹ Amaiak ninjen o, id maror san kagin tigane ilasap, agod id nug dabai tupanip, kagin an mi turip tator a.

²⁰ Onj ananj ninjen o mi, Anut san urat an, ilo rumok adi ilod lo yan ta pitinini na wa. Rumok, melmel fidian tani san a Anut malan lo yan ikok mok a, id an ka tani wa. Ak gug onj mel ta wani dop lo tamol sen ak aupasek lo yau idu tap, onj au upas da.

²¹ Ago yak ninjen o, onj mudan wani ak lo boi, tia, you sakar uluk ak lo boi, tia, mel dugo gane dak lo boi, kabelan onjane tei aupasek lo ganep yau idu banau. Tia, onj kagin ago ta gane na tap, kagin naok an mi uyanan a.

²² Onj melmel dugon ilo lo rumok an mi onj Anut

da luluŋam lo yen da. Talpein ta san ilo rumok an man oŋsa mel tia ya. Saen talpein iŋanen kagin naok uyanan a ilo lo rumok an bitinaek lo igane dop, mel ta saian ak ta ile na tap, iŋ ilon uyanan mok a.

²³ Ago gug, talpein ilon uraru dugo yani tap, Anut san bitinaek lo yau idu wa. Man dugo, iŋanen kagin an ilo rumok lo ilasa man tia ya. Mel ta iŋanen ilo rumok an lo ta ilasa na dan, nek an mi aupasek mok a.

15

Kristus ilon ipanaŋ ak igo mi aŋ dam nug ilon apani wa

¹ Id a ilod lo rumok dabai an, id tamolpein a sad ilo rumok dabai tia yan tibinawaip sad muruan dida tisini wa. Idsed niŋed o mi tamat dop aenta tabianai man kagin uyan tia ya.

² Id anen anen atem turad muroud ilo uyan tupidinai a, ago dop iŋ dal uyan ak lo mi dutor a. An lo iŋsad ilo rumok an dabai anda ilasa wa.

³ Agod Kristus iŋsinanen ilo ibol an ta iri na da. Tia, iŋ muruan dam isini da. Ru girek lo na igo ibol, “O Anut, tamolpein a dupaio saian an iŋsad tiŋae saiak an ŋai ŋisini a.”

⁴ Ru fidian a nal gubak mi Anut san tamolpein digire yan, an id ipiteŋanad san niŋen digire ya. Id muruan lo tatur sakar dan lo, agod ru girek san dabai panek ru lo, id mel a niŋen o mala nouk tumado dan nuŋon ago ilasa wa.

⁵ ŋai aŋ niŋemi wo Anut igo ŋugudani a. Anut iŋ dabai panek ru san fun, agod iŋ muruan lo tatur sakar san fun, iŋ ka ibinawaŋ pe aŋsem nugug

lo ilom kisaek mi amado wa. An Jesus Kristus atutuñani dan lo kagin amaiak mi ago agane yau a.

⁶ Dal an lo saen an Anut ubou an ale dan, an fidian awam kisaek mi Anut, Jesus Kristus idsad Tubun en Taman, amaiak yañan abisa da.

⁷ Fun amaiak niñen o an nug niñen amat mok a, nek ibol Kristus sen an injilian uyanan ak igo won a. Ago dop an ago agane dan lo Anut yañan abisa wa.

⁸ Nai ago ñurupaian dan san fun igo ya. Kristus in Juda adi sad urat pinein on ilasa ya, an lo Anut ikubiai tile yak inñsan ru an ru rumok a. Ago dop ru a Anut Juda sad tubud bagedi ibol ipidinai an nuñon kuai isi wa.

⁹ In ago igane yan lo Anut san ilo muñanek an tamolpein Juda tia yak ipidinai, an lo in dam Anut yañan diabisa wa. Nek a girek lo ibol ago,

“Fun an niñen nai on gob adi luluñad lo yaña ñabisa wak,
nai bar ñabi dop on yaña ñabisap lak na isida yau a.”

¹⁰ Agod ru girek en fon ago ibol,

“O an Juda tia yan, an Anut san tamolpein dadi yousai agane.”

¹¹ Agod fon,

“O an Juda tia yan fidian, Tubun en yañan abisa,
an tan titin an fidian san tamolpein bar abi dop per apani.”

¹² Agod fon, Aisaia ago ibol,

“Tamol Jesi dubol dan dabin lo didilan ta isa wa,
agop in isap tan titin fidian sad tamolpein kagin ipidinai a.

Juda tia yan in tinid digane panip dumado wa.”

¹³ Aria, nai an fidian ninemi wo Anut igo nsumiani a. In mi, madok uyanan a ninen o mala nouk amado dan san fun, an ilom lo rumok an lo yousai tubun, agod ilo maror mok an an bubem lo idaisuda yak, ago ka igane ilasa wa. Ago dop an lo na an Urgun san dabai lo tubun mi mala nouk amado dan lo atur a.

Anut Pol ipilianig gob adi ibinawai o ru sinek tamol ilasaya

¹⁴ Nai teig taog, aenta an ninemi wo nai durupa-ia g a, nek ago mi naisag ilog dam ru kisaek an mi ago irupaia g da. Ru an igo ya. An kagin uyan ak tinim lo yen an awan isa ya. An manau amam da ya, an ninen an ansem nug ka apitenjani wa, ago dop an nugnug lo an sam ilo sou katukan an akubune wa.

¹⁵ Gug naisag girek en lo, nai ru kagin aenta nurupaian an kuai te nabol ilasap alon an ninen ta narer na ya. An lo nai ananem ilo sou nabisa dop ate an mel gubak mi alon la yan ilom isou da wa. Nai Anut san ilo munanek lo yanak ipanag amaiak lo ago njigane ya.

¹⁶ In nai Jesus Kristus san urat pinein ipilianag go Juda tamolpein tia amaiak njibinawai o nupalu ya. Agod naisag urat en igo ya, nai pris igo won Anut san bilalun uyanan an nfulale wa, ago dop an lo nai tamolpein Juda tia yan nanal pe lou kawan igo won Anut tuon lo nidirai a. Agod Anut nai tuog lo inal pe Awan Urgun san dabai lo tamolpein e gun idiraig dilasa yen Anut uyan ipidinai a.

¹⁷ Amaiak ninjen o, ηai Jesus Kristus lo Anut san urat uyan ak wei mi ηigane ilasa ya. Amaiak lo Anut naon na ηaiseg ka ipitianag a.

¹⁸ ηai mel dugon Kristus ηaisag urat lo ta igane na yan ninjen o ηabol ilasa wo ηarer da. Tia, ηai gob adi dal an ηukubiai dilep Anut awan duri dupani san amaiak mi ninjen o ka ηabol ilasa wa. Mel ta ηaisag ru lo, ηaisag urat lo,

¹⁹ ηaisag kulob girager inη urat tutubun da ηigane dan lo, agod Awan Urgun san dabai lo, amaiak mi ninjen ηabol ilasap alonη a. Amaiak lo ηai aben fidian lo ηau a, Jerusalem na fun ηigane gug ηau nag ηaisag tureη wadan Ilirikam* na ηilasa ya. ηai Jesus Kristus san bilaluη uyanan amaiak panu fidian san tamolpein ηurupidai dulonη a, mel ta ηai ηumiani man tia ya.

²⁰ ηai panu fidian a Kristus yaηan dulonη san tia yan lo ηaup ate inη yaηan ηufulale wo ilog ibol da. ηaiseg ilog pempem yen dan ago mi a. ηai ago ηigane dan fun dugo, ηai talpein sen ak san kadanη iguni la yak fo na ab ηususe man ηamoi a.

²¹ Tia, nek ru girek lo ibol ago,
 “Tamolpein a inη ninjen o ta durupidai dulonη na yan inη dile dulonη a.
 Agod tamolpein a inηsan ru ta dulonη na yan, inη ilod isafulale wa.”

Pol Rom na yau o ilon yen da

²² ηai anηsam na ta ηupalu na man fun ηai panu aenta lo urat wei mi ηigane na ya, agod an ηai anηsam na ηupalu san dal itute ya.

* **15:19:** Albania

²³ Gug gamu panu an fidian lo man ηai abeg tia ya, amaiak ninen ηai ante ru ηufulale na yan gamu itout a. Anajar wei kasik ηai anjam na ηupalu wo ilog yen a,

²⁴ agod gamu ηupalu wo ago ηigane da. ηai Spein na ηaup ru ηufulale wo ηigane da. An ninen saen ηai anjam gigin lo ηupalu dan, ηai saen katukan mi an ηilian o ilog isou da. ηai an da tumado wo ilog uyanan da, murna gup an ηai Spein na ηau an ninen asatuanag dop dabai ka apanag a.

²⁵ Ak man malan malan man ηai Jerusalem na ηaup ilo rumok adi atna dumado dan ηubinawai o ilog yen da.

²⁶ Midaen fidian a Akaia na Masedonia na dumado dan ilo sou diganeg, moni dutumanig ilo rumok adi filiad tia a Jerusalem na dumado dan sad na digane yau a.

²⁷ An man injsiganed ilo girek mi a. An uyan mok a, ago gug mel en dam rumok a, Juda adi in insad pani naon ta gob adi tinid lo yen da. Man dugo, Juda ilo rumok adi in mel uyanan ηutun san a Jesus Kristus lo amaiak in dupidinai a. Ago yak ninen tamolpein Juda tia yan melmel tinid san an ate inaned pani naon dukubune wa, an lo inaned muruan aenta dupasi yau a.

²⁸ Aria, ηai inaned ru nunon digane yan ninane ηaup banid lo ηigane gup fon anjam na ηupalu da wa, ago gup Spein na ηau a.

²⁹ Taida mi, ηai ago ηalon ak saen ηai anjam na ηupalu dan, ηai Kristus san bar ηai lo awan isa yan anjam na ηupalu dop da ηisini ηupalu wa.

³⁰ ηai teig taog, ηai abinawag o ηusumianan da.

Anj Jesus Kristus san a, nek naj igo mi a, agod Awan Urgan san ilo panek anj dam bubem lo igane ya. Fun an ninen, saen naj nugudani dan anj naj awag abatep gudanek tubun ak tigane wa. Agod anj Anut asumiani onj dop naj ibinawag a.

³¹ Juda ilod lo rumok tia yak a Judea na dumado dan inj naj dufunag o digane da. An ninen o Anut asumiani dop naj inj banid lo ipasag injiliag a. Naj injanen tamolpein Jerusalem na yan lulunad lo urat nigane wan dam ninen asumiani dop urat an ninen ilo uyan ipidinai a.

³² Ago dop Anut ilon ibol tap, naj ilo uyan amag da ago anjam na nupalu pe anj naj da ilod kisaek sisem yaes tabal uyan a.

³³ Ilo maror san Anut anj fidian da ka amado wa. Rumok.

16

Pol ilo uyan ru tamolpein wei mi ipidinai a

¹ Aria, gamu naj ru wadan taida nurupaian onj da. Id lud Fibe inj Rom na ipalu wa, ago yak ninen o anj inj kagin apani uyanan o naj ilog ibol da. Inj pein gurman, agod inj Kenkria taun san midaen an lulunad lo urat igane da.

² Inj dam Tubun en san ilo rumok pein, ago yak ninen anj ilo uyan lo mi anjanep kagin apani wa. Ilo rumok adi dal naon an dirip dutor ak man uyanan a. Pein an mel ta lo katukan dop abinawi. Man dugo, inj tamolpein wei mi ibinawai na ya, agod naj dam ibinawag a.

³ Akwila iwon Prisila da ilo uyan nupidinai, inj naj dibinawag go Jesus Kristus san urat migane ya.

⁴ Agog saen Juda ηai dufunag o digane yan in ηai dubalgiranag a, in ηai abeg dijaneg dumat o ta direr na ya. An ninen ηaineg ilo uyan in ηupidinai da, agod ηai mi tia ya, tia, tamolpein Juda tia yan sad midaen in dam inaned urat uyanan an ninen ilo uyan dupidinai a.

⁵ Agod fon ilo uyan midaen a in sad ab lo dutumani dan sad na migane yau a.

ηaineg turag Epenetus ηaisag ilo uyan in apani, in tamol malan malan Esia ilon lo in Kristus ninen ilon lo rumok a.

⁶ Maria ilo uyan apani, in an ninemi wo urat wagai tubun mok igane se ya.

⁷ Andronikas in iwon Junia da ilo uyan apidinai. In ηai turag muroug Juda, agod in ηai da sisem dusubanama ya. In dam yanad aposel, agod in Kristus malan malan dulon gug ηai murna ηalon a.

⁸ Ilo uyan Ampliatus apani, Tubun en san kagin lo in ηaisag turag uyanan a.

⁹ Ilo uyan Urbanas apani, in man da sisem Kristus urat an migane da, agod ηaineg turag Stakis dam ilo uyan apani.

¹⁰ Apeles ilo uyan apani, in san urat uyanan an Kristus ileg ilon uyan a.

Ilo uyan ilo rumok adi Aristobulas san samun lo yan apidinai.

¹¹ Herodian ilo uyan apani, in ηai turag, in dam Juda.

Ilo rumok adi Nakisus san samun lulon lo dumado dan ilo uyan apidinai, in dam Tubun ak san.

¹² Trifena in Trifosa da ilo uyan apidinai, pein uraru an Tubun en ninen o urat wagai digane da.

Persis ilo uyan apani, pein an mañanema luma, in niñen tubun mi mamat da, in dam Tubun en niñen o urat wagai igane da.

¹³ Rufus ilo uyan apani, Anut an lulunam lo yanjan tubun ak ago ipiliani a. In tinan dam ilo uyan apani, in dam n̄aisag tinag on a.

¹⁴ Asinkritas in Flegon, agod Hemes, Patrobas, Hermas agod ilo rumok adi aenta in dadi dutu-manı dan ilo uyan apidinai.

¹⁵ Filologas in iwon Julia da ilo uyan apidinai, agod Nerias in lun da dam, agod Olimpas in ilo rumok adi fidian dida dumado dan an dam ilo uyan apidinai.

¹⁶ Ansem nug ilo uyan apani. Kristus san midaen aben e lo dumado den fidian an̄sam na ilo uyan digane ipalu ya.

Tamolpein a an lulunam lo biatitek digane ilasa dan leil apidinai o uyanan a

¹⁷ Teig taog, tawan agane wo n̄ai n̄urupaian da. Tamol a an lulunam lo biatitek in muruan da digane ilasa dan, an niñedi wo kagin agane. In̄sad ru an naon sen geig a, ibol an ru rumok ak alon ago tia ya. Fun amaiak niñen an sen alasa wo n̄urupaian da.

¹⁸ Man dugo, tamolpein naok an man Kristus Tubun en san urat ta dubinawi na da, tia, in in̄sed tinid dufutuwi san urat tamol dumado da. In̄sinad ru sewak, ru bulbal an lo tamolpein ta dulon uyan na yan dirawai da.

¹⁹ Tamolpein fidian an̄sam awa yabek uyanan an dulon a, an niñen o n̄ai an niñemi wo youg isa da. Gug n̄ai ilog ibol dak an kagin uyan ak mi niñen

manau amam da, agod kagin saian ak ninen anjaon mok ak man uyan a.

²⁰ Ago dop Anut, ilo maror taman an, in milaen tiap Satan an niem paen na iganep iparfufari wa.

Jesus Kristus idsad Tubun en san ilo mujanek an da amado.

Tamol aenta ilo uyan ru diganeg Rom sad na yau a

²¹ Timoti, naisag urat kisaek an, ilo uyan ipanañ da. Nek ago mi nai turag muroug, Lusias in Jason da agod Sosipata da dam ilo uyan dupanañ da.

²² Nai Tertias, naisag banig nam Pol san girek en nigire ya. Nai dam Anut yanjan lo an ilo uyan nupanañ da.

²³⁻²⁴ Gaias dam ilo uyan ipanañ. In man da mumado ya, man kagin am igane uyanan a. Agod fon midaen a in san ab lo dumado yan an sam na ilo uyan digane ipalu ya.

Erastas ilo uyan ipanañ. In taun Korint san moni kagin ipani da. Agod Kuatus ilo rumok tamol an dam ilo uyan ipanañ a.

Pol Anut yanjan yabisa san ru wadan

²⁵ Aria, gamu id Anut yanjan tabisa dop ubou an tile wa. In naisag bilalun uyan ak Jesus Kristus ninen nifulale dan lo, an dabai ipanañ pe lo atur sakar san idaisida ya. O gubak mi Anut san bilalun en imianig imianuk yen a, ak man id talon an ninen kuai te igane ilasa ya.

²⁶ Agod gamu profet adi sad girek lo ru en kuai isi a. Ago dop an lo tan titin fidian san tamolpein ru e dulon en Anut sen ago digane wo in ru kagin ibol ilasa ya. Anut, kumaen pempem imado dan,

ago ibol ilasa an lo tamolpein ilo rumok san dal
turi tupani dan, inŝan awa yabek tamolpein tilasa
wa.

²⁷ An niŝen inŝ yaŝan tabisa. Inŝ mi Anut, inŝ mi
maŝau tamol a. Jesus Kristus yaŝan lo mi, inŝ mi
yaŝak tubun ak pempem inŝane wa. Rumok.

Anut san bilalug foun
The New Testament in the Takia Language of Papua
New Guinea
Nupela Testamen long tokples Takia long Niugini

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 18 Apr 2025 from source files dated 31 Aug 2023

757b3e4e-2023-5b45-893a-ee9294ddeb9d